



**Republika e Kosovës**  
**Republika Kosovo / Republic of Kosovo**  
**Kuvendi i Komunës Rahovec**  
*Skupština Opštine Orahovac / Municipal Assembly of Rahovec*



**PROCESVERBAL**

Nga mbledhja e rregullt e Kuvendit Komunal të Rahovecit, e mbajtur më **25.07.2024**, me fillim në orën **10:10**. Mbledhjen e kryesoi Kryesuesi i Kuvendit, **z. Arbër Zenuni**. Në fillim kryesuesi konstatoi kuorumi për mbajtjen mbledhjes ekziston. Në fillim të mbledhjes, nga 31 anëtarë, të pranishëm kanë qenë 25.

**Kryesuesi:** Përshëndetje për të gjithë! I nderuar Kryetar i Komunës, **z. Smajl Latifi**, Nënkryetar **z. Fatmir Iska**, i nderuar anëtarë të Kuvendit Komunal, drejtorë të drejtorive komunale, zyrtarë komunalë, përfaqësues të KFOR-i medie, të nderuar qytetarë të Komunës së Rahovecit. Për këtë mbledhje të shtatë të vitit 2024, së bashku me kryetarin kemi vendosur për këtë rend dite:

**REND DITE**

|                                          |                             |
|------------------------------------------|-----------------------------|
| <b>RAHOVEC /ORAHOVAC</b>                 |                             |
| Njësia Nr./Br./No 01 (Kuvendi i Komunës) |                             |
| Nr./Br./No 9/23                          | Nr. i faq./Br.str./No.pg 68 |
| Data/Datum/Date 23 / 07 / 2024           |                             |

1. Shqyrtimi dhe miratimi i procesverbalit nga mbledhja e kaluar;
2. Pyetjet, përgjigjet dhe diskutimet e kuvendarëve;
3. Shqyrtimi dhe miratimi i vendimit për dhënien në shfrytëzim afatshkurtër të pronës komunale Nr. 00889-0, ZK- Çifllak, në sipërfaqe prej 11765m<sup>2</sup>;
4. Shqyrtimi dhe miratimi i vendimit për formimin e komisionit për zbatimin e procedurave dhe vlerësimin e ofertave të dhënies në shfrytëzim të pronës së paluajtshme të komunës P-00889-0 ZK, Çifllak, në sipërfaqe prej 11765m<sup>2</sup>;
5. Shqyrtimi dhe miratimi i vendimit për dhënien në shfrytëzim afatshkurtër të pronës komunale Nr. 00889-0, ZK- Çifllak, në sipërfaqe prej 860.00 m<sup>2</sup>;
6. Shqyrtimi dhe miratimi i vendimit për formimin e komisionit për zbatimin e procedurave dhe vlerësimin e ofertave të dhënies në shfrytëzim të pronës së paluajtshme të komunës, P-00889-0 ZK, Çifllak, në sipërfaqe prej 860.00 m<sup>2</sup>;
7. Shqyrtimi dhe miratimi i vendimit për faljen e borxhit të papaguar për taksën komunale, respektivisht - qiranë e shfrytëzimit të hapësirës publike;
8. Shqyrtimi dhe miratimi i vendimit për shpalljen me interes të përgjithshëm publik, P-00041-1, ZK-Drenoc;
9. Shqyrtimi dhe miratimi i vendimit për shpalljen me interes të përgjithshëm publik ndërtesë P-00644-0, ZK-Rahovec;
10. Shqyrtimi i Raportit Financiar, janar – qershor 2024;
11. Shqyrtimi i Informatës të Drejtorisë për Bujqësi, Pylltari dhe Zhvillim Rural;
12. Shqyrtimi i Informatës të Drejtorisë për Shëndetësi dhe Përkujdesje Sociale;
13. Shqyrtimi i Raportit të Drejtorisë për Arsim rreth përfundimit të vitit mësimor 2023/2024;
14. Shqyrtimi i Informatës mbi realizimin e Planit të Punës së Zyrës së Prokurimit, janar-qershor 2024;
15. Shqyrtimi i Informatës mbi parcelat publike të dhëna në shfrytëzim nga Kuvendi Komunal!
16. Shqyrtimi i Informatës mbi realizimin e planit për mirëmbajtjen e hapësirave të hapura publike në Komunën e Rahovecit;

**Kryesuesi:** Këto janë pikat e rendit të ditës të parapara për sot. E vendosim në votim, kush është “për”?... Konstatohet që unanimisht (22) votohet rendi i ditës i paraparë për mbledhje të shtatë të kuvendit komunal.

## **1. Shqyrtimi dhe miratimi i procesverbalit nga mbledhja e kaluar;**

**Kryesuesi:** A kemi ndonjë koment apo diskutim nga anëtarët e kuvendit rreth procesverbalit nga mbledhja e kaluar? Nëse jo, atëherë po e vendosim në votim! Kush është “për”?... Unanimisht aprovet pika e parë e rendit të ditës.

## **2. Pyetjet, përgjigjet dhe diskutimet e kuvendarëve;**

**Ilir Pallqa:** Faleminderit kryesues! I nderuar kryetar, nënkryetar, kolegë asambleistë, drejtorë të drejtorive, të nderuar të pranishëm. Grupi i interesit të “KF. Rahovecit”, vazhdimisht po parashtron pyetje rreth gjendjes së punimeve të kompleksi sportiv të epopeja. Kur do të përfundojë dhe a do të jetë i gatshëm për zhvillimin e lojërave kampionale gjatë muajit gusht.

**Burim Krasniqi:** Faleminderit kryesues! Përshëndetje për ekzekutivin, kolegë asambleistë, monitorues dhe të gjithë që jeni këtu. I kam tri pyetje: E para, te projekti i sheshit qëndror. Drejtor, a ka projekt detal projekt i sheshit qëndror, apo ka vetëm ideor dhe paramasë?... Nëse ka, e bëj kërkesën publike dhe zyrtare për qasje në dokumente zyrtare për ta parë projektin detal të sheshit qëndror. E dyta, te kompleksi sportiv të Epopeja e UÇK-së, ka qenë një kompleks multifunksional për disa lloje të sporteve. Kompleksi është modifikuar vetëm në një fushë. A ka ndryshim të projektit prej atij fillestar? Ndryshimet a janë bërë përmes vlerësimit të një komisioni profesional, të cilët kanë vlerësuar që ndryshimet mund të bëhen, nëse krahasojmë edhe koston dhe modifikimet. E treta, ka mbi një muaj që i kam dërguar e-mail shefit të zyrës së prokurimit për qasje në dokumentet zyrtare për projektin e lumit “Rimnik”. Deri sot nuk kam marrë asnjë përgjigje deri sot. A është kërkesa e gabuar, a t’u ka drejtuar juve si kryetar komune për këtë kërkesë, ta lejoni, ose jo? Ku qëndron problemi? Besoj që është e drejtë për çdo qytetar që të ketë qasje në dokumente zyrtare, nuk është diçka e ndaluar. Nëse kërkesa është bërë gabim, së paku ta kemi një përgjigje: “Kërkesa juaj për qasje në këtë projekt është adresuar gabimisht”. Kam kërkuar një datë të caktuar, se kur më lejohej të shkoj ta shoh projektin, pse nuk ka ndodh deri sot?

**Bejtullah Deliu:** Faleminderit i nderuar kryesues! I nderuar kryetar, zëvendës, drejtorë, kolegë, media dhe të gjithë të pranishëm. Ka një kohë të gjatë që me drejtorin e arsimit kemi diskutuar rreth komisionit për vlerësimin dhe shqyrtimin e ankesave për dhënien e mëdijëve. Ende nuk ka ndonjë raport. Nëse ju kujtohet kryetar, ka pasur shumë shkelje të orëve dhe nuk ka qenë në rregull që keni thënë që brenda një jave formohet komisioni. Kanë kaluar 7-8 muaj dhe nuk ka asnjë lëvizje dhe asnjë informatë. Ka mësimdhënës që janë dëmtuar direkt financiarisht.

**Defrim Kafexhiu:** Përshëndetje! I nderuar kryetar i komunës, nënkryetar, të nderuar kolegë anëtarë të kuvendit, drejtorë të drejtorive, zyrtarë, media, përfaqësues të KFOR-it. Unë dëshiroj ta shtjelloj një çështje, ku kërkoj që të jenë më të përgjegjshme dy institucionet e komunës, kuvendi dhe kryetari i komunës. Në seancën e kaluar, pavarësisht debatit që e kemi pasur, ajo që nuk i ka hije kuvendit dhe që unë jam munduar ta ndaloj dhe përmirësoj për atë që kam qenë unë kryesuesi. Qasja e kryetarit, e dimë që ndonjëherë varet prej emocioneve dhe nervozës së tij. Ofendimi i anëtarëve të kuvendit mendoj që duhet të jetë pjesa ku kryesuesi duhet ta bëjë mbrojtjen e tyre. Duke filluar prej meje, por edhe me anëtarë tjerë të kuvendit, kryetari disa herë e ka potencuar që “ti fol palidhje”, “ti nuk din”, “ti naj herë ia qëllon”. Nuk besoj që kjo është gjuhë që duhet të përdoret brenda kuvendit që ne sado vota që i kemi, 200-300 vota që thotë kryetari, kjo nuk na bënë neve asgjë, përveç që kjo qasje e kryetarit neve na rritë. Kërkoj nga kryetari që të jetë më i qartë te kjo pjesë dhe t’i ndalojë afendimet ndaj anëtarëve të kuvendit. Përgjatë diskutimit që e ka pasur, kryesuesi me një moment tha që lëri këto “debate koti”. Nuk mund të arrish te një vlerësim kur një tem që trajtohet në kuvend komunal, t’i thuash “debat kot”. Kërkoj ta përmirësohet këtë qasje në kuvend. Githashtu, të falënderoj edhe ty edhe kryetarin për mundësinë e debatit që po e krijojmë bashkërisht, qoftë me minuta shtesë për ndonjë tem të caktuar. Një pyetje tjetër për kryetarin e komunës, te zgjata e kontratave: E dimë që me ligj të prokurimit, zgjatja e kontratës që projekti të përfundojë është 3 vjet, a mund të ngirret ky standard për Komunën e Rahovecit, ku edhe çështja e buxhetimit do të ishte më e lehtë dhe siguria për qytetarët më e madhe. Përkundër intensitetit që po punohet në shesh, qytetarët nuk kanë besim që mund të përfundojë brenda afatit ligjor, shkak i përvojës së kaluar që projektet nuk përfundojnë me kohë. Kjo do ta shtonte më shumë vlerën e komunës.

**Sejfullah Sejfullahu:** Faleminderit kryesues! Përshëndetje kryesues, kryetar, nënkryetar, drejtorët, kolegët, monitoruesit. I kam disa pyetje të lehta, kryesisht për Drejtorinë e Shërbimeve Publike. Rreth rrugës për dri, poshtë. Bujqësia lidhet shumë me atë pjesë dhe është e domosdoshme kur do të intervenoni në kanalizim dhe t'i sanoni disa defekte, si dhe do të ishte shumë mirë nëse përfundon edhe asfaltimi, sepse aty rrezikohen fëmijët dhe të rriturit. E dyta, te ndriçimi publik t'i bëni presion pak operatorit, sepse ka defekte në ndriçim dhe në kanalizim. Për kryetarin e kam një pyetje duke pasur parasysh që "Ismajl Kadare" është fitues i çmimit "Ukshin Hoti" dhe pasi që nuk është më në mesin tonë, a ka ndonjë hapësirë që një emër i ndonjë rruge apo ndonjë shesh, ta mban emrin e tij, nëse ekziston ndonjë mundësi kur bëhen riemërtimet e rrugëve.

**Edona Kryeziu:** Faleminderit kryesues! I nderuar Kryetar i Komunës Smajl Latifi, drejtorë të drejtorive, kolegë, monitorues. Kam një pyetje për drejtorin e Shërbimeve Publike, drejtor, para 2-3 seancave të rregullta, të kam kërkuar që t'i vizitosh nga afër rrugët e fshatit Xërxë dhe gjendjen e tyre. Rruga që të shpie te ambulanta është në gjendje të mjerueshme. Në rrugën "Lidhja e Lezhës" në çdo 20-30 metra pusetat janë të hapura, gjë që sjell shumë frikë për fëmijët dhe për kalimtarët e rastit. Rruga te udhëkryqi, saktësisht afër shkollës fillore, po ashtu është në gjendje të mjerueshme. Kërkoj nga ju që të merrni masa, që këto rrugë të kthehen në gjendje të kalueshme sa më shpejt që është e mundur.

**Eqrem Spahiu:** Faleminderit kryesues! Përshëndetje kryetar, kolegë asambleistë dhe të gjithë të pranishmit në sallë. Kryetar, e kam një brengë që në fshatin Opterushë nuk po shkon diçka mirë në lidhje me punimet që po i bën KRU-Gjakova, ose nuk don që të zgjidhet problemi, ose nuk ka trysni të mjaftueshme nga ana e kuvendit dhe ekzekutivit. Në momentin kur po flasim, në Opterushë nuk kemi ujë të pijshëm. Nuk e di se çfarë marrëveshje keni me KRU-Gjakovën, por, ose trysni për punë të mirë, ose ta ndërpreni marrëveshjen.

**Merisa Sharku:** Përshëndetje për të gjithë! Rezultatet preeliminare të numrit të banorëve të komunës sonë, kanë dalë rreth 41.000, prej matjes së fundit që kanë qenë 56.208. Rënia është prej 26% dhe mendoj që është shumë rënie e madhe. E dimë që në Kosovë në "trend" është migrimi i jashtëm dhe kur e shqyrtojmë këtë temë të ndarë në komuna, e shohim që në disa komuna është më e theksuar. Komuna e Rahovecit ka rënie të madhe, përveç kësaj, Rahoveci ka pasojat shumë të mëdha në migrim të brendshëm. Studentat e Rahovecit në moment që përfundojnë studimet, mbesin në Prishtinë, ndërsa shumë pak prej tyre kthehen për të dhënë kontribut në Rahovec. A ndiheni përgjegjës dhe ku mendoni që është problemi që po ndodh kjo?

**Kryetari:** Faleminderit kryesues! Të nderuar drejtorë të drejtorive, nënkryetar, anëtarë të kuvendit të komunës, monitorues. Faleminderit për kontributin e diskutimeve në paraqitjen e shqetësimeve dhe kërkesave që natyrisht meritojnë përgjigje. Shprehi mirëseardhje për bashkatdhetarët dhe shpresojmë që gjatë kësaj periudhe, dëshira, vullneti dhe përpjekjet tona janë që ata të kenë shërbime më të mira. Kemi një sportel të veçantë për ta, që zakonisht e bëjmë çdo vit. Do të ketë edhe aktivitete dhe iniciativa shtesë, p.sh: Sot erdhi një shkresë për reklama nëpër qytet, nëse nuk gaboje është nga Ardit Sylka. Përgjigja ime ishte që po, për t'i dhënë më shumë shije në estetikë qytetit. Pyetjeve do t'i përgjigjen edhe drejtorët e drejtorive. Sa i përket kompleksit, përgjigjet Afrim Dina. Përparim Kraniqi i përgjigjet kërkesave për infrastrukturë. Avni Morina nuk është me ne, sepse sot e marton djalin. Albnor Mullabazi do të përgjigjet te pyetja e Burim Krasniqit, rreth sheshit qëndror. Te kërkesat në qasje në dokumente publike do të përgjigjem unë. Te Bejtullah Deliu, meqenëse nuk është drejtori i Arsimit, do të përgjigjem unë. Do të përpiqem ta jap një shpjegim për Defrim Kafexhiun rreth gjuhës dhe komunikimit në kuvend. Zakonisht, çdo herë kam reaguar kur të tjerët kanë vepruar me një gjuhë jo të arsyeshme. Te zgjatja e kontratave, do të përgjigjem unë. Te Sejfullah Sejfullahu do të përgjigjet Përparimi. Merisës do të përpiqem t'i jap përgjigje unë, aq sa di. Te kërkesa për qasje në dokumente publike, ne shquhemi si komunë për përgjigje të shpejtë. Adresa në këtë rast nuk ka qenë e saktë. Qasja për dokumente zyrtare bëhet përmes Blerta Gashi Nalli-it, që është zyrtarë për qasje në dokumente publike. Të inkurajoj ta bësh, sepse ne brenda shtatë ditës jemi të obliguar të japim përgjigje dhe zakonisht nuk e presim shtatëditëshin, por e bëjmë më herët. Komisioni për verifikimin e asaj që është materie e kontratës kolektive. Bejtullah, ne kemi vërejtur situata që ndonjë mësimdhënës, qoftë për ndonjë gabim teknik të avokatit që e ka përfaqësuar lëndën e tij, qoftë për ndonjë arsye tjetër, kanë bërë përsëritje. Pra, një here e ka realizuar të drejtën që i takon dhe pa të drejtë, e ka përsëritur atë. Natyrisht, ne kemi vlerësuar ta krijojmë një komisioni, i cili e verifikon listën



e vendimeve gjyqësore të listave për pagesë. E vërteta është që kontrata kolektive po zbatohet, por diku i kushtuar me pasoja të rënda financiare Komunave të Republikës së Kosovës. Sot, jemi në një situatë shumë sfiduese dhe deri më 30 qershor kemi paguar 1.6 milion € për kontratën kolektive. Është shqetësuese, sepse nëse e kemi një kontratë për një projekt, thesari nuk të pyet, t'i merr dhe komuna jonë për momentin është e bllokuar në qasje për pagesa. Anëtarët e komisionit me vendim janë: Egzon Thaqi, Valmir Gashi, Jeton Krasniqi. Ky komision ka prodhuar rezultate të dobishme në mbrojtje të buxhetit të komunës, sepse ekziston mundësia që në mungesë të këtij komisioni të dëmtohet buxhet i komunës. Te zgjatja e kontratave: E vërtetë është që dëshira e secilit autoritet kontraktues është që të zgjatet kontrata. Duhet ta pranojmë faktin që ka vonesa në zbatim të kontratave, sepse prej ores 10:00 deri në 16:00 nuk punohet dhe kjo ju ka shkaktuar operatorëve telashe në organizimin e punëtorëve. Ka kontrata që kryhen shumë shpejt, bile edhe para afatit dhe ka prej tyre që vonohen më shumë se sa që mund të projektohen në fillim. Te gjuha e përdorur, që me fillim jam ngjendje t'i kërkoj ndjesë ose falje të gjithë atyre që e kanë ndërjet veten të lënduar në paraqitjet dhe pikëpamjetet e mia. Unë gjithmonë ia kam filluar pasi më kanë rënduar të parët, si institucion apo te kolegët e mi. Gjuhë fyese, përçarëse, përçmuese, nuk është mirë të kemi as në kuvend, as në realacionet brenda ekzekutivit. Te mënyra e reagimit dhe te temperamentit nuk mund të bëhem ndryshe, sepse i kam bërë 53 vjet. Nuk mund të rikthehem në moshën 18 vjeçare dhe të bëjë imitime. Karakteri formësohet në moshën e 18 vjeçare dhe një është e sigurtë, që jam në gjendje t'i menazhojë situatat më të rënda se sa këto këtu në kuvend. Incidentet kurrë nuk kanë qenë dhe nuk janë për të krijuar karrierë politike. E ftoj kryesuesin, kuvendin dhe ekzekutivin që t'i përbahen gjuhës sa më të arsyeshme. Rezultati preliminar i regjistrimit të popullsisë është ky. Unë kam qenë kryetar i komisionit komunal dhe aty janë edhe disa anëtarë, përfshirë edhe përfaqësuesin për pakica. Kemi tentuar që t'i shfrytëzojmë të gjitha hapësirat që mos të mbetet askush pa u regjistruar. Raportimi nuk ka ndodh te kryetari i komunës, por kemi marrë informata nga regjistruarit dhe kemi pasur komunikim të mirë edhe me Agjencionin e Statistikave. Sipas raportit preliminar janë 41.777 banorë. Raporti final pritet të del raporti përfundimtar dhe ky numër mund të shkojë deri në 42.100 - 42.300, sepse mund të ketë edhe diçka që ka mbetur e papërfshirë. Rënia e numrit të banorëve është shqetësues. Ka ulje të natalitetit, ka migrim të jashtëm dhe të brendshëm. Këto dukuri janë duke ndodhur në të gjitha komunat e Kosovës, qoftë edhe me migrim të brendshëm. Kuadrot nuk rrijnë këtu, sepse Prishtina është e madhe dhe pashmangshëm ka më shumë mundësi. Po përpiqemi ta afirmojmë një organizatë joqeveritare që është formuar në Prishtinë, unë kam qenë dy herë, me emrin "FARDI". Këta përpiqen ta dëshmojnë me anë të shumë aktiviteteve në bashkëpunim me komunës, që nuk e harrojnë origjinën e tyre. Kjo është vetëm një formë nga qindra forma të mundshme. Studentë për bursa janë 230 aplikues dhe të gjitha ankesat e bursistëve i kemi miratuar. Rreth 100.000€ po iu japim atyre që kanë nevojë për një bursë dhe gjithsej janë 195 bursa. Përprojekte të shumta jemi duke bërë dhe janë legjitime për parandalimin e migrimit të brendshëm. Sa i përket rënies së popullsisë, gati në të gjitha komunat e Republikës së Kosovës ka rënie, diku 25%, diku 26%, kuptohet duke e bërë krahasimin me regjistrimin e fundit të vitit 2011. Ju njoftoj që ligjshmëria për listën rezervë për emërimin e rrugëve ka ardhur. Unë jam i interesuar dhe jam pro, për Ismail Kadarenë, nëse ka ide dhe pozicion dhe pse mos ta emërtojmë ndonjë hapësirë publike me këtë emër.

**Afrim Dina:** Faleminderit kryesues! I nderuar kryetar, nënkryetar, kolegë drejtorë, të nderuar asambleistë. I pata dy pyetje, të dyjat lidhen me kompleksin sportiv. Unë jam në komunikim të vazhdueshëm me klubin e Rahovecit, të cilët aktualisht po i bëjnë stërvitjet për fillimin e sezonës. Kampionati vjeshtor për superligën fillon me 10 gusht, ndërsa për ligën e parë, me 18 gusht. Jemi duke punuar intensivisht në "Kompleksin Sportiv", duke i përmbushur obligimet tona që i kemi si komunë dhe pjesa tjetër për bari sintetik mbetet te federata. Në komunikimin e vazhdueshëm që e kam me federatën, ata e kanë bërë porosinë e barit sintetik dhe fundi i korrikut dhe eventualisht fillimi i gushtit, bari do të vjen në Rahovec. Aktualisht jemi duke i rregulluar zhveshtoret, sot përfundon pllaka e dytë dhe menjëherë fillojmë me suvatim, si dhe gjithashtu është bërë porosia e dyerve dhe dritareve. "Kompleksi Sportiv" do të jetë funksional sipas projektit të paraparë, aktualisht është duke u bërë rregullimi i fushës së parë ndihmëse, sepse kompleksi i ka dy fusha të vogla ndihmëse. Shtegu i atletikës është shtruar me shavor dhe mbetet të shtrohet edhe me pjesën e asfaltit. Për 10 ditë përfundojnë punimet për zhveshtore, në bazë të kompanisë që po i kryen punimet.

**Burim Krasniqi:** Drejtor, pyetje ishte kështu: A ka ndryshime në mes projektit fillestar mbi bazën e të cilit është kontraktuar dhe ekzekutimit të projektit?

**Afrim Dina:** Në fazën e parë të projektit të kompleksit sportiv, pikërisht kanë qenë dy fushat e vogla ndihmëse, me rrethojë te vetëm aty dyjat. Mirëpo, në fazën e dytë është bërë revidimi i projektit dhe me kërkes të federatës kanë kërkuar që zhveshtoret duhet të zmadhohen, si dhe është planifikuar që komplet kompleksi të rrethohet, në mënyrë që të ruhet bari për arsye të shumta.

**Burim Krasniqi:** Drejtor, nuk po e kontestoj që qëllimi i modifikimit është për të mirë. Megjithatë ndryshimi ka procedurë. A ka pasur komision profesional, i cili e ka bërë revidimin e projektit? Ndryshimi a ka pasur kosto financiare? Përveç pjesës së minimumit që e kemi diskutuar, pjesa e zhveshtoreve e ka pasur aneks kontratë për t'i përfunduar edhe zhveshtoret?

**Afrim Dina:** Faleminderit Burim! Të gjitha këto kanë procedura! Pjesa e zhveshtoreve është pjesë e fazës së dytë të kompleksit. Të gjitha procedurat kanë përfunduar sipas rregulloreve që kërkojnë.

**Kryetari:** Dua ta plotësoj Afrimin pak, që Burimi ta kuptojë deri në fundi kontekstin. Është një standart që quhet kolaudimi i pozicioneve, të cilat bëhen një bazë zë një situata që përshkruhet përmes një komisionit, përmes mbikëqyrësit, përmes menagjerit dhe në këtë rast në lojë është futur edhe Federata e Futbollit e Kosovës me kriteret e veta. Nëse nuk bëhen këo kolaudime në këtë rast, atëherë, je subjekt i njësisë për hetimin e krimeve të rënda. Gjithçka është me procedurë dhe shpresoj që nuk kemi gabime teknike.

**Albnor Mullabazi:** Faleminderit kryesues! I nderuar kryetar, kolegë drejtorë, asambleistë dhe pjesëmarrës tjerë. Sa i përket pyetjes për projektin e sheshit qëndror, punimet në shesh po vazhdojmë dhe për momentin jemi duke punuar në unazën e sheshit e cila do t'i lidh 4 rrugë. Te pjesa e stadiumit i kemi ndalë punimet për shkak të fuksit të mërgimtarëve, po ashtu edhe bjektet, veda dhe hardhia janë larguar, të njëjtat janë kthyer në parkingje, deri në funksionalizimin e parkingut nëntokësor brenda sheshit. Sheshi qëndror, përveç projektit ideor ka edhe projektin kryesor, sepse nuk jam ndoshta aq i guximshëm që të punoj në projektin më të madh urban të Komunës së Rahovecit, pa një projekt. Gjatë rrugës ky projekt do të ketë edhe plotësime, e kemi kompaninë projektuese. Projekti i sheshit qëndror ka projekt kryesor, gjendet në urbanizëm dhe të ftoj pas seancës në zyrë ose të kërkon për qasje zyrtare.

**Përparim Krasniqi:** Faleminderit kryesues! Përshëndetje kryetar, përshëndetje për të gjithë kuvendarët e pranishëm, të nderuar përfaqësues të LMT-së. Sefa e bëri pyetjen rreth rrugës kah drini! Po Sefë, aty kemi punuar instalime nëntokësore, gypin e ujit dhe kanalizimit. Gjendja nuk është e mirë, për shkak se duhet të finalizohet me asfaltim dhe e kemi lutur kompaninë që të asfaltohet sivjet, sepse e ka gjatësinë 1400m. Përveç kësaj, në Krushë të Madhe është edhe një segment që do të bëhet një rrugë çasje të bizneseve dhe një kolektor. Sa i përket ndriçimit publik dhe riparimit nga KRU Gjakova, në mëngjes e kemi kontaktuar Ismet Berishën, që është menazher i njësisë së KRU Gjakovës për regionin e Prizrenit dhe për çështjen e ujit të pijshëm e menazhon edhe Krushën e Madhe, si dhe do ta bie pjesën teknike që duhet të ndërhyjë në çështjen e kanalizimit. Në ndriçim publik nuk kemi probleme. Problemi kemi me operatorë kabllorë që janë privatë. E kemi dërguar një kërkesë në KEDS, sepse gjatë punës që bëjnë i këpusin edhe telat e ndriçimit publik. Në Krushë të Madhe i kemi zënë me fakte. Edona Kryeziu pyeti për rrugën në Xërxë: Po, është e vërtetë ajo që thotë Edona, gjendjen jo të mirë të rrugëve e ka shkaktuar KRU Gjakova, gjatë ndërhyrjeve në rrjet të ujësjellësit. Ne i kemi angazhuar inspektorët dhe nëse nuk përgjigjen do të marrin dënime. Te riparimi i rrethrotullimit, ajo është rrugë rajonale dhe komuna nuk e ka në kompetencë riparimin. Kjo kërkesë është adresuar përmes policisë dhe përmes inspektoratit tonë, sepse i kemi dy probleme serioze: Në rrugën rajonale Rahovec – Krushë e Madhe dhe në rrugën rajonale në udhëkryqin në Xërxë. Sa i përket ujit të pijshëm në Opterushë: Ne e kemi dërguar kompaninë KRU Gjakova, ata kanë dalur në vend të ngjarjes dhe kanë thënë që janë dy ventilë që janë prekur nga pjesa e Opterushës që është e prekur me pengesa për furnizim të rregullt të ujit të pijshëm. E kemi marrë një konfirmim zyrtar që ata ventilë do të mbyllen dhe do ta shohim situatën tutje. Ne jemi në komunikim të shpeshtë me zyrtarët e KRU Gjakovës.

**Vlora Vuçiterna:** Përshëndetje për të gjithë! Unë e kam një pyetje të shkurtë për kryetarin. Para disa seancave kur e kam ngritë shqetësimin në lidhje me mbylljen e pediatriisë pas orës 14:00 dhe marrjen e shërbimeve në po të njëjtin

vend fëmijë dhe të rritur. Keni premtuar që nëse me të vërtetë është gjendja e tillë, gjë që është, keni me ndërmarrë ndryshime. A keni ndërmarrë diçka, apo mbetet si premtim?

**Leonard Moria:** Faleminderit kryesues! Përshëndetje për kryetarin, nënkryetarin, drejtorët e drejtorive, asambleistët, qytetarët. Meqenëse u përmend arsimi dhe bursat, e kam një pyetje: Në thirrjen për bursa, kriteri ka qenë që të jetë student në universitetin publik dhe nota mesatare 7.0. Ndërsa në disa email-a që i kam pranuar nga studentët e nivelit master, sepse nuk është specifikuar që duhet të jetë veç niveli bachelor, kanë ardhur dhe kanë aplikuar dhe dosja nuk u është pranuar. E dyta, a ka mundësi që vitit tjetër të ketë bursa për nivelin master, sepse edhe këta na bëjnë krenarë nesër kur të marrin tituj të ndryshëm.

**Kryetari:** Faleminderit kryesues! Kam premtuar që do të interesohem për këtë temë. Besoj që e kemi adresuar këtë çështje, Saranda e din më mirë. Unë menjëherë e kam thirrur menaxhmentin e QKMF-së. Sa i përket bursave, më tregoni si ta rrisim buxhetin e komunës, prej mbi 1 milion për subvencione, ta bëjmë 2 milionë dhe atëherë mund t'i subvencionojmë edhe të nivelit master, por edhe doktorët. Na kanë dëmtuar shumë duke na marrë buxhetin për kontratën kolektive. Nuk jemi kundër kontratës kolektive, por, Komuna e Rahovecit dhe asnjë komunë e Kosovës nuk e ka nënshkruar kontratën kolektive. Pra, për vitin 2025, sipas qarkores së parë buxhetore, i kemi 1.010.000€. Subvencionimi shkon për bujqësi, kultur, rini dhe sport, bursa për studentë dhe nxënës, për mbulim të shpenzimeve të varrimit, start-up biznese për gra, për ndihma momentale dhe për shumë situata që cilësohen subvencione. Përveç studentave të nivelit master, unë jam pro t'i përkrahim edhe doktorët.

**Saranda Sallteku:** Faleminderit Vlora! Reparti i Pediatriisë nuk është i mbyllur, punon deri në ora 14:00, ashtu siç është e paraparë në kujdesin primar shëndetësor. Pas orës 14:00 punon mjeku i përgjithshëm, si të punojë në katin e parë, si në të tretin është i njëjtë. E kemi urgjencën 24 orë dhe ekipën mobile për shtëpi.

**Defrim Kafexhiu:** Faleminderit kryesues! Dua t'ju jap pak respekt drejtorëve që ishin të mirë në përgjigjet e tyre dhe ju inkurajoj që vazhdimisht të dilni të përgjigjeni. Te çështja e kryetarit: Limiti i arsyeshmërisë së fjalëve që përdoren në debate parlamentare duhet të gjykohej prej kryesuesit të kuvendit. Reaksioni fjala kundër fjalës dhe që nuk e fillon gjithmonë i pari, nuk besoj që qëndron. Ti e sheh me një këndvështrim tjetër, por nuk qëndron. Sa do të rënda që janë fjalët, ju e keni përgjegjësinë ekzekutive, ndërsa unë nuk kam. Këtu e kam përgjegjësinë e përfaqësimit të qytetarëve kundrejt punës që ju e bëni, në lëvdata apo kritika. Përgjegjësia është tek ju dhe është normale që "limiti i arsyeshmërisë së fjalëve" duhet të jetë më i lartë, sesa prej ekzekutivit kundrejt kuvendit. Te gabimet që i bën në punë, shfryhesh te anëtarët e kuvendit. Këtu është edhe një problem tjetër, sepse në debat me anëtarët e kuvendit dispropocioni i kohës është katastrofal, psh: Për një replikë që e kam 3 minuta, ju debaton 33 minuta dhe kjo gjendje ta mundëson ty që të luajnë emocionet dhe të del diçka edhe jashtë arsyes, si dhe reaksioni rritet më shumë, sepse ndoshta bëhesh nervoz edhe me kohëzgjatjen e fjalimit tënd. Te amandamentimi i kontratave, deri në çfarë periudhe mund të zgjaten kontratat? "FARDI" më vjen mirë që është një bashkim i shoqërisë rahovecase që vepron në Prishtinë dhe në vende tjera, besoj që mund të japin shumë kontribut. I ftoj që përveç këtij aktiviteti në Gradish, nuk e ka parë asnjëherë që kanë mbajtur takime në Komunë të Rahovecit, një kritikë e butë. Te numri i popullsisë, te migrimi i brendshëm mund të jenë njëri nga faktorët edhe institucionet komunale. Nëse e marrim shembull që njerëzit në këtë kohë kanë qejf që vendi i tyre të jetë më i zhvilluar, minimalisht të ketë banesa të mjaftueshme, që ata mund të banojnë me qera, shkak që njerëzit në këtë kohë nuk dëshirojnë të jetojnë në bashkësi sikur më herët. Të rinjtë e Rahovecit pas fejesës dhe martesës nuk kanë ku të bashkëjetojnë këtu dhe po dalin në Prishtinë. Parkingu nëntokësor i sheshit qëndror në plan ka qenë të përrurohet në qershor, nuk është përruruar. Në lagjen e epërme ka më shumë se një muaj që nuk ka ujë, besoj që duhet të bëni më shumë trysnë te KRU Gjakova, sepse ka shumë ankesa nga qytetarët e lagjes së epërme.

**Kryetari:** Si për 3 minuta, si për 33, unë i pranoj përballjet dhe kam gatishmëri. Anëtarin e kuvendit e inkurajoj të ketë vërejtje dhe kritika, sidomos alternative. Kjo nuk do të thotë që anëtari i kuvendit ka të drejtë të bëjë kualifikime apo fabrikime. Të mirëpritura janë kritikrat legjitime, pavarësisht a më pëlqejnë, apo jo. Gjuha fyese është e

papranueshme si në seancë, ashtu edhe në realacion me ekzekutivin dhe anasjelltas. Mirë është të dakordohemi në parim që mos të kemi gjuhë fyese në kuvend. Unë kam marrë pjesë në një nga seancat e parlamentit të Mbretësisë së Bashkuar. Atje përplasjet janë konceptuale, kritikantët janë parimore, bile për respekt, kur të flet njëri prej anëtarëve të grupit, tjerët ngriten në këmbë. Është e vërtetë që Rahovecit ka nevojë për ndërtime të larta, po ashtu është e vërtetë që Komuna e Rahovecit dhe asnjë komunë e Kosovës nuk ndërton ndërtesa të larta. Komunitetët krijojnë kushte dhe lehtësira për investitorin privat. Ne tani e kemi PZhK-në dhe jemi në pritje të HZK-së që nga muaji mars nga ministria. Defrim, edhe ti deri vonë e ke pasë në qejf jetesën bashkë me prindë, tani ka ardhur një tendencë pozitive të planifikimit të jetës më ndryshe. Fejohu më shpejtë se banesa gjendet diku. Fejohuni ju të rinjtë, mos rrini kështu “palidhje”. Besoj që ndryshimi është i mirë. Sa i përket migrimit të brendshëm, Prishtina është hapësirë e madhe, njerëzit e aspirojnë më shumë. Kjo nuk është duke ndodhur veç te ne, por në të gjithë Kosovën. “FARDI” e ka marrë një subvencion për monografinë për masakrat që kanë ndodhur në komunën tonë. Kjo është një vepër, që ata e kanë për detyrë deri ka marsi i vitit të ardhshëm ta bëjnë gati për promovim.

**Vlora Vuçiterna:** Dua të ndërlidhem me drejtoreshën me atë që tha që si në kat të tretë, si në të parin është njëjtë. Nuk është njëjtë drejtoreshë! Pasi thua që është njëjtë, pse nuk po e bartni edhe gjinekologjinë poshtë? E para, ka dallim, sepse fëmijë e merr ndaras trajtimin e nevojshëm dhe jo bashkë me një të rritur. E dyta, lart, fëmijët kontrollohen nga pediatri specialist, pastaj si ia bëjnë ata fëmijë që shkojnë në ora 1 për një infuzion, d.m.th pak para mbylljes të ndërrimit të parë, duke e ditur që infuzioni zgjatë më shumë se një orë. Ka ndodhur shumë herë, që fëmija bashkë me infuzion të zbret prej katit të tretë në të parin. Meqenëse është e paraparë në udhëzim administrativ, pse deri tani keni punuar kundër udhëzimit administrativ?

**Saranda Sallteku:** Gjinekologjinë nuk e zbrisim poshtë, sepse lart punon gjinekologu. Pas orës 14:00 punon mjeku i përgjithshëm familjar.

**Dafina Gashi:** Faleminderit kryesues! Kur po flitet këtu për përgjegjësi dhe për llogaridhënie, nëse ka mundësi ta dimë arsyen e dështimit të mbledhjes së Komitetit për Shëndetësi dhe Përkujdesje Sociale që ka qenë për këtu muaj?

**Vlora Vuçiterna:** Faleminderit Dafinë për këtë pyetje, por më preke pak në çështje familjare! Në këtë rast është shumë i informuar Skenderi, mungesën e kam pasur me arsye, sepse vajzën e kam operuar dhe ka pasur 10 ditë pushim nga mjeku.

### **3. Shqyrtimi dhe miratimi i vendimit për dhënien në shfrytëzim afatshkurtër të pronës komunale Nr. 00889-0, ZK- Çifllak, në sipërfaqe prej 11765m<sup>2</sup>;**

**Erhan Morina:** Faleminderit kryesues! Të nderuar anëtarë të kuvendit, drejtorë kolegë, media. Bëhet fjalë për zonën kadastrale në Çifllak, parcela është e komunës, P-00889-0. Po marrim vendim për ta dhënë me qera për 15 vjet, me kulturë të klasit të katërt për qëllim bujqësor dhe vetëpunësim, në sipërfaqe të përgjithshme prej 35.227m<sup>2</sup>, por në shfrytëzim do të jepen vetëm 11.765m<sup>2</sup>.

**Sejfullah Sejfullahu:** Konkretisht për çka është paraparë kjo parcelë dhe a ka të interesuar?

**Erhan Morina:** Po i nderuar, unë e ceka që qëllimi i marrjes në shfrytëzim është për qëllime bujqësore.

**Kryesuesi:** Faleminderit drejtor! A kemi ndonjë diskutim tjetër? Nëse jo, atëherë e vendosim në votim, kush është “për”?... Unanimisht me 24 vota votohet pika e tretë.

### **4. Shqyrtimi dhe miratimi i vendimit për formimin e komisionit për zbatimin e procedurave dhe vlerësimin e ofertave të dhënies në shfrytëzim të pronës së paluajtshme të komunës P-00889-0 ZK, Çifllak, në sipërfaqe prej 11765m<sup>2</sup>;**

**Erhan Morina:** Kjo pikë lidhet me pikën paraprake. Kërkohej të formohet komisioni prej 5 anëtarëve, 2 prej tyre nga ekzekutivi, 2 nga kuvendi dhe 1 nga sektori joqeveritar.

**Kryesuesi:** Atëherë, shkojmë me propozimet e juaja!

**Hasan Përboqi:** AAK – Florida Bajraktari!

**Leonard Morina:** LVV – Ilir Pallqa!

**Eqrem Spahiu:** LDK- nuk kemi propozim!

**Sejfullah Sejfullahu:** PDK – nuk kemi propozim!

**Kryesuesi:** Atëherë, ndërkohë edhe dy propozimet tjera do të jenë nga ekzekutivi i komunës dhe një nga sektori joqeveritar. Nga kuvendit janë Florida Bajraktari dhe Iliri Pallqa. E vendosim në votim, kush është “për”?... Unanimisht me 23 vota kalon pika e katërt.

**5. Shqyrtimi dhe miratimi i vendimit për dhënien në shfrytëzim afatshkurtër të pronës komunale, Nr. 00889-0, ZK- Çifllak, në sipërfaqe prej 860.00 m<sup>2</sup>;**

**Erhan Morina:** Para jush keni propozim-vendimin për dhënien në shfrytëzim të parcelës, 00889-0 në ZK- Çifllak. Këtu duhet që sekretaria ta përmirësojë, sepse jepen në shfrytëzim 8600m<sup>2</sup> dhe jo 860.00m. Qëllimi i dhënies në shfrytëzim është kultivimi i bujqësisë.

**Ilir Pallqa:** A është e destinuar vetëm për bujqësi? Në rregull, faleminderit!

**Kryesuesi:** Faleminderit Ilir Pallqa! Atëherë, e vendosim në votim, kush është “për”?... Me shumicë unanime 20 vota “për”, aprovet pika e pestë.

**6. Shqyrtimi dhe miratimi i vendimit për formimin e komisionit për zbatimin e procedurave dhe vlerësimin e ofertave të dhënies në shfrytëzim të pronës së paluajtshme të komunës, P-00889-0 ZK, Çifllak, në sipërfaqe prej 860.00 m<sup>2</sup>;**

**Erhan Morina:** Para jush keni propozim-vendimin për formimin e komisionit për zbatimin e procedurave dhe vlerësimin e ofertave të dhënies në shfrytëzim të pronës së paluajtshme të komunës, vendimi ndërlidhet me pikën paraprake, P-00889-0 ZK. Komisioni duhet t’i ketë 5 anëtarë.

**Kryesuesi:** Atëherë, dy përfaqësues do të jenë nga kuvendi i komunës.

**Hasan Përboqi:** AAK, propozojmë Sinan Kryeziun!

**Leonard Morina:** LVV, nuk kemi propozim!

**Eqrem Spahiu:** LDK, nuk kemi propozim!

**Sejfullah Sejfullahu:** PDK, propozojmë Melinda Oruqi Iska!

**Kryetari:** Nga ekzekutivi janë Besmirë Bytyqi dhe Afrim Oruqi dhe ndërkohë një përfaqësues nga ojç.

**Kryesuesi:** Faleminderit! Komisionin si të tillë e vendosim në votim, kush është “për”?... Kundër?... Abstenim?... Unanimisht (19) votohet edhe pika e gjashtë.

**7. Shqyrtimi dhe miratimi i vendimit për faljen e borxhit të papaguar për taksën komunale, respektivisht - qiranë e shfrytëzimit të hapësirës publike;**

**Përparim Krasniqi:** Faleminderit kryesues! E kemi një kërkesë nga një banor i Krushës së Madhe, ekskluzivisht nga Bajram Ramadani, për shfrytëzimin e hapësirës publike konkretisht objektit të përkohshëm. Tani aty është ndërtuar parku dhe janë rikthyer 4 objekte dhe palët që kanë qenë aktive më herët, kanë bërë kërkesë që t’ju bëjmë kontratë 1 vjeçare, sipas rregullores që e kemi për shfrytëzimin e hapësirës publike. Bajrami, i ka pasur disa obligime të papaguara dhe është një periudhë që disa vite nuk ka punuar, në dosje i keni edhe procesverbalet e inspektoratit. Këtu kërkohet që të merret një vendim për pezullimin e aktiviteteve ndërvite që nuk ka punuar. Për pjesën tjetër të borxhit të mbetur, të bëhet një draft marrëveshje që ta bëjë pagesën dhe t’ia japim kontratën e re.

**Defrim Kafexhiu:** Në mbledhjen e KPF-së kam kërkuar që nëse ekzistojnë procesverbalet e Drejtorisë së Inspektionit për çdo vit, prej vitit 2011-2017. Në material nuk e kemi asnjë procesverbal.

**Përparim Krasniqi:** Unë kam menduar që e kam përcjellur te zyra e kuvendit, përndryshe të gjitha procesverbalet i kam këtu, për pak minuta do t’i keni afër.

**Burim Krasniqi:** Po ndalemi te një individ. Në KPF kërkova që nëse ka raste të njëjta, pse mos të jenë këtu? A vlerësohet diskriminuese që sot këtij t’ia falim dhe dikush e ka të njëjtën rrethanë. Mendoj që duhet të marrim vendim në parim, sepse është e ndjeshme dhe në një formë që nëse nuk e falim, ai nuk ka punuar fare dhe të ngarkohet nuk është korrekt nga ana jonë. Në anën tjetër, nëse është ndonjë tjetër me rrethana të ngjashme, atëherë mirë është ta kemi një listë të tyre për t’ju falur obligimet dhe për t’ju riformuluar kontratat. Përndryshe, po e lëmë në besim të plotë tek ju që nuk ka operuar, kemi dëshmi që nuk ka operuar dhe nuk dua të paragjykoj në atë drejtim.

**Kryetari:** E kam mirëkuptuar Defrimin dhe posaçërisht Burimin! Burimi e shtroj edhe një çështje që është parimore. E ftoj drejtorin e Ekonomisë dhe të Shërbimeve Publike që diku ka shtatori ta përgatisin një listë të atyre që



potencialisht mund të jenë situata të ngjashme dhe nëse ka lejon ligji, atëherë ne operojmë si ekzekutiv dhe kuvend. Pajtohem në atë që nuk është ndoshta e ndershme që është veç ky rast, por ne e kemi pranuar vetëm këtë kërkesë. Te lokalet atje, njërin prej tyre do të jepet për postë, njëri për KRU Gjakovën, një e ka marrë një berber dhe tjetrën ky i fundit që ka pasur operime me faza, megjithatë mbetet një borxh dhe falet një tjetër ku është ngarkuar ndonëse nuk ka punuar. Në mbledhjen e shtatorit do të përpiqemi ta bëjmë një listë të operatorëve, që nëse ka dhe nëse ligji na lejon, t'ju falim nga një borxh për periudha të caktuara. Unë nuk jam për të bërë lobin për rastin konkret, por e ftoj kuvendin të vendosë ashtu siç e vlerëson edhe pse ndoshta është mirë që t'ia japim një mundësi.

**Përparim Krasniqi:** Vetëm edhe një sqarim, kjo nuk është falje e borxhit. Në bazë të procesverbalit bazohemi dhe është pezullim i asaj periudhe që nuk ka punuar, si dhe obligim për të mbeten edhe 6700€ që kuvendi na autorizon të bëjmë draft-marrëveshje që pala të paguan me një afat të caktuar me rata.

**Burim Krasniqi:** Çështja që e diskutuam që ta kemi në parim, mendoj që i mundëson komunës të ketë të hyra dhe besoj që i mënjanojmë borxhet e këqija. Megjithatë, në pikën 1 të vendimit, potencohet që inspektorati i ka procesverbalet që nuk ka operu, si grup i LDK-së besojmë që ashtu është. Në seancat tjera presim që kjo të ndodh edhe me të tjerët, që mos të jemi diskriminues dhe si vendim e ka përkrahjen tonë.

**Leonard Morina:** Parimisht edhe pse nuk e njoh personin, në KPF kam qenë kundër këtij vendimi. Nuk jam që mos t'i ndihmoj atij, por gjithashtu kam frikë që këto praktika do të përsëriten. Të njëjtën praktikë do ta ndjekin të gjithë ata që kanë toka, apo lokale të komunës në shfrytëzim. Nëse nuk ka operuar, ai ka qenë në kontratë dhe besoj që ai është dashur t'i paguaj obligimet. Ne mund të marrim prona në komunë dhe të themi që nuk e kam punuar tokën 3 vite dhe ta kërkoj faljen e borxhit. Nuk duket praktikë e mirë. Nëse është veç ky person, nuk ka të tjerë dhe nuk ka ndonjë rrezik që të ketë përsëritje, atëherë jemi në rregull.

**Sinan Kryeziu:** Faleminderit kryesues! Përshëndetje për të gjithë të pranishmit në sallë! Kur jemi te kjo pikë, më lejoni ta jap kontributin tim në lidhje me anën ligjore. E mbështes këtë ide, sepse nuk e di sa e keni lexuar ligjin. Ligji çdo herë e favorizon qytetarin e thjeshtë, personin fizik, në këtë rast person juridik është komuna. Më pëlqen marrëveshja që e ka bërë drejtoria përkatëse për faktin se me ligj është "parashkrimi i borxhit publik. Zotëriu në fjalë, më vjen mirë që një pjesë për pagesë ka vullnet të lirë ta paguaj dhe një pjesë tjetër ka gatishmëri për falje. Nëse më merr mua si përfaqësues, komuna nuk mund t'ia marr as këtë shumën e mbetur që është mbi 6000€, sepse ligji e thotë që borxhi parashkruhet brenda një viti e gjysmë, ndërsa këtu bëhet fjalë që zotëriu në fjalë nuk ka paguar 10 vite.

**Merisa Sharku:** E kemi një rast, ku në stacionin e autobusëve e kemi pas një kontratë të njëjtë, personi nuk ka operuar dhe njëkohësisht e ka paguar qeranë. Nëse ai e dëgjon këtë rast, mund të vijë në komunë dhe çka nëse ai kërkon që ato mjete t'i rimburohet, sepse është rasti është i njëjtë. Nëse është kështu, atëherë këtu bëhet një hamulli dhe komplikohet situata.

**Kryetari:** Kështu, në stacion të autobusëve po krijon kushte që të ketë burime të mira financiare, me anë të lokaleve afariste. Ai lokali për të cilin po flet, ka paguar qera, por nuk ka pasur leje dhe i nderuari z. Fehmi Hoxha nuk ka arritur ta pajis me leje asnjëherë, si dhe tani i takon ekskluzivisht stacionit të autobusëve. Ne jemi në dilemë, bashkë me bodrin e stacionit që a ta rrëzojmë atë objekt, apo ta lëmë ashtu siç është. Nuk është ky rast i ngjashëm Merisë, por raste të tjera mund të ketë dhe është mirë që t'i shqyrtojmë.

**Bejtullah Deliu:** Faleminderit kryesues! Ne ballafaqohemi jorallëherë me mungesë të dokumentacionit për një pikë sikur kjo dhe jemi në lajthitje se si të veprojmë. Te ju qenka raporti i inspektoratit, mirëpo ne nuk e kemi dhe duhet t'i besojmë fjalëve që i thatë. Në rregull është që ne t'i kemi paraprakisht gjërat që të dimë se çka po votojmë. E dyta, si lejohet që kaq shumë vite të mbahet një kontratë pa ndonjë vërejtje dhe pa ndonjë rishqyrtim nga ekzekutivi apo nga personat përgjegjës, 6-7 vite ai nuk operon, nuk paguan dhe nuk jep asnjë përgjegjësi. Këtu është pikëpyetja, pse është lejuar kaq vite kjo kontratë? E treta, ekzekutivi nuk është në dijeni nëse ka raste të tjera të kësaj natyre, pse të ngutemi që këtë pikë tani ta votojmë, nëse kryetari thotë që në shtator do ta kemi një listë me një analizë më të thukët lidhur me rastet e tilla. Të shtyhet kjo pikë dhe të bëhet votimi i rasteve në tërësi. Ndoshta ky person e meriton që plotësisht t'i falet kjo, por kur është individualisht, mendoj që dikush "diskriminohet" dhe dikush "favorizohet". Nëse ekzekutivi është në mëdyshje që mund të ketë ende raste të tilla, pse jo që edhe kjo pikë të mos bartet në shtator?

**Kryetari:** Ne jemi në suaza të paragjytimeve, ndërkohë në tavolinë e kemi një situatë konkrete! Praktika e pezullimit të borxhi, kush e mban në mend, këtij kuvendi i ka ndodh shumëherë. Është situatë konkrete, personi ka bërë kërkesë dhe tregon që ka një obligim, si dhe procesverbalet të cilat tregojnë që nuk ka operuar. Nuk kemi kërkesa të tjera të kësaj natyre. Kërkova nga drejtoritë që në shtator ta bëjnë ndonjë listë, nëse ekziston edhe ndonjë rast i tillë. Unë jam për ta hedhur në votim, a votohet a jo, unë nuk jam për ta marur njërin, apo tjetrin rol.

**Defrim Kafexhiu:** Të gjithë qytetarët e Komunës së Rahovecit duhet të mësohen ta vlerësojnë pronën e shtetit-komunës. Nuk është i vetmi rast, qytetarët që e marrin në shfrytëzim qoftë një objekt, apo një tokë, e vlerësojnë më pak se kur e marrin me qera prej një personi fizik tjetër. Tash është më mirë, sepse është krijuar një standard i ri me pronat komunale dhe më duket se çmimi është më i arsyeshëm, si dhe çmimi e tregon edhe vlerën e pronës. Te ky rast, para se ta vendosim në votim, minimalisht i kërkoj kryesuesit të na skenojë procesverbalet dhe në pjesën e pauzës një orëshe që mund ta shqyrtojmë më mirë. Plotësisht pajtohem me Leonardin dhe Bejtullahun që mund të ketë edhe raste tjera. Parimisht jam për t'i krijuar zgjidhje për shkak të akumulimit të borxhit, por minimalisht duhet t'i shohim dokumentet.

**Burim Krasniqi:** Nëse mundem pak të ndihmojë si proces. Drejtor, nuk është problem i madh ta dërgosh dikë t'i bëjë fotokopje dhe së kapu 5-6 kopje t'i kemi para vetes. E dyta, te pjesa tjetër që po flasim për veprim në parim dhe për rishikim të obligimeve, mendoj që drejtoritë mund ta shohin listën kush ka situatë të ngjashme, t'i vlerësojnë edhe ata që nuk kanë situatë të ngjashme se çka mund t'i falet që mos të kalojë në borxh të keq. Operatorit duhet t'ju drejtoheni me shkresë, t'i thoni "a jeni të gatshëm për marrëveshje"? Para se ta marrin vendimin në asamble, sepse nuk mund të marrim vendim, nëse ai thotë që "nuk jam i gatshëm". Nëse ai nuk është i gatshëm, janë procedurat përmbartimore që i realizon komuna. Në parim, mendoj që duhet ta bëni një listë në të ardhmen të atyre që kanë obligime dhe të cilët janë të gatshëm për marrëveshje, apo jo dhe besoj që krijohet një situatë kur rifillohet prej zeros në këtë drejtim. Akumulimi i borxheve nuk bën zgjidhje për institucionin, përveç telasheve që nuk kemi as mekanizëm të realizimit të tyre.

**Kryetari:** Sektori i tatimit në pronë, sektori i bizneseve dhe drejtoritë, bëjnë marrëveshje në baza ditore, madje edhe për tatimin mbi pronë. Bëjnë programim të borxhit, me rata apo sezona. Është normale që këto marrëveshje bëhen në mënyrë që të mos akumulohen borxhet. Bëhen marrëveshje të reja, rishikim të borxheve në baza ditore. Aktualisht po flasim për një listë potenciale dhe nëse na lejon ligji, formalisht duhet t'i shlyejmë. Përndryshe për marrëveshjet për të cilat fole, bëjmë gati çdo ditë. Nëse dikush i ka borxh 5000€, gjysmën prej tyre e paguan menjëherë, ndërsa pjesën tjetër brenda vitit. Votoni si ta vlerësoni, mirë është t'i japim epilog.

**Kryesuesi:** Faleminderit kryetar! Atëherë, pas diskutimeve të shumta, pikën e shtatë e vendosim në votim. Kush është "për"?... Kundër?... Abstenim?... Atëherë, me 11 vota pro, 2 kundër dhe 6 abstenim, kalon pika e shtatë e rendit të ditës. Vazhdojmë me pauzën e drekës një orëshe.

#### **8. Shqyrtimi dhe miratimi i vendimit për shpalljen me interes të përgjithshëm publik, P-00041-1, ZK-Drenoc;**

**Erhan Morina:** Para jush keni propozim-vendimin e kryetarit për shpalljen me interes të përgjithshëm ndërtesën administrative KB Bujku në Drenoc, me numër të parcelës 00941-1, shfrytëzues ekonomia e pyjeve. Qëllimi është inicimi i procedurës për shpronësimin e kësaj lokale dhe meremetimin e shtabit të UÇK-së.

**Kryetari:** Bëhet fjalë për ish objektin e shtabit rajonal të UÇK-së në Drenoc. Fatkeqësisht është nën menaxhim të AKP-së. Ne kemi kontratë për riorganizim aty dhe duhet ta marrim vendimin për shpallje me interes të përgjithshëm. Do të renovohet dhe do të bëhet si tip muzeu dhe qëllimi është që ta mbrojmë me vendim të kuvendit.

**Kryesuesi:** Atëherë, nëse nuk kemi diçka tjetër, këtë pikë e vendosim në votim. Kush është "për"?... Unanimisht (20) votohet edhe pika e tetë.

#### **9. Shqyrtimi dhe miratimi i vendimit për shpalljen me interes të përgjithshëm objektin e ndërtesës me Nr. 00644-0, ZK – Rahovec;**

**Kryetari:** Drejtori mesiguri ka edhe informata më të rëndësishme dhe më të detajizuara, nëse do të ishte drejtori për Gjeodezi dhe Kadastërt, sigurisht edhe më shumë. Bëhet fjalë për objektin në qendër të qytetit të Rahovecit, aty ku ka qenë dikur një shitore e këpucëve, apo aty ku e ka shfrytëzuar Qamil Sylka etj. Rezulton që ata i paguajnë qera komunës, ndërsa objektet janë të AKP-së. Dëshirojmë që t'i mbrojmë me vendim të kuvendit dhe të shohim tutje.

**Defrim Kafexhiu:** E pata një pyetje të çështja e shpalljes me interes të përgjithshëm dhe pas kësaj vjen shpronësimi. A janë tarifat e njëta si të komunës në raport me Agjencionin e Privatizimit? Besoj që ka qenë i njëjti rast si me shpronësimin e ish pompës së shtetit dhe arsytimi i drejtorit që e ka dhënë në KPF ka qenë shkak se nëse nuk vazhdojmë si komunë t'i përvetësojmë këtë objekte, atëherë mund të dalin në shitje apo privatizim.

**Kryetari:** Mund të jetë raste përafërsisht të ngjashme. Ne do të ndjekim edhe hapa të guximshëm dhe nëse mund t'ia marrim krejt realisht, sepse është një situatë interesante, ata i paguajnë qera komunës dhe jo AKP-së.

**Kryesuesi:** Faleminderit kryetar! Atëherë, nëse nuk kemi diçka tjetër, këtë pikë e vendosim në votim. Kush është "për"?... Unanimisht (20) votohet edhe pika e nëntë.

#### **10. Shqyrtimi i raportit financiar, janar-qershor 2024;**

**Afrim Limani:** I nderuar kryesues, kryetar, nënkryetar, asambleistë! Raporti 6-mujor financiar, për dallim ai 3-mujor, që është i ndarë nga dy pjesë kryesore, pjesa e të hyrave dhe pjesa e shpenzimit të buxhetit, ky raport përpos këto dy elementeve që i ka, i kemi edhe numrin e kontratave të lidhura në mënyrë të detajuar. Në raport raport janë të futura obligimet kontraktuale, financiare, si dhe analitika në përgjithësi për këto shpenzime. Të hyrat për këtë periudhë gjashtëmujore në total janë 893.815€ dhe kur i krahasojmë me periudhën e njëjtë të vitit të kaluar, atëherë, kemi një minus prej 136.101€. Bashkë me gjobat e gjykatave dhe të trafikut të cilat i keni në raport, në total të hyrat janë 947.442€ dhe kur i krahasojmë kemi një minus prej 218.000€. Ndërkohë ka ardhur edhe raporti për gjobat e gjykatave dhe trafikut për 3 mujorin e dytë dhe kanë qenë prej 92.671€ dhe që në total të hyrat rriten për t'u bërë 1.040.000€ dhe diferenca finale është minus 125.663€. Në raport i keni edhe realizimet e të hyrave sipas kodeve ekonomike, raportin e tatimit në pronë, shpenzimin e buxhetit (12.412.000€) apo 62.79%. Në këtë raport e keni edhe raportin e kontratave të lidhura deri në këtë periudhë, që deri më tani është 1.691.000€. Vlera e obligimeve kontraktuale në total duke filluar nga viti 2020 është prej 16.256.000€, nga ky total ka investime kapitale dhe mallra dhe shërbime dhe kur e zbresim këtë të dytën, atëherë vlera kontraktuale është 14.173.000€. Ju rikujtoj që buxhet për t'u shpenzuar për këtë vit kanë mbetur edhe mbi 33% të buxhetit. I kemi projeksionet për vitet 2025-2027 dhe vlera e këtyre projeksioneve është e mjaftueshme që të jemi komod, që këto obligime kontraktuale do të mbulohen. Vlera e obligimeve financiare për këtë gjashtëmujor në total është prej 277.000€.

**Leonard Morina:** Së pari e pyes drejtorin, ndoshta është edhe çështje teknike: Këto karakteret që po dalin nëpër kolona, a ka mundësi pse nuk ka të dhëna, po vetëm karaktere dhe jo informacion shifror? Te kodi 50013, taksa për certifikata të lindjes: Te planifikimi për vitin 2024 i keni planifikuar 14.000€, ndërsa realizimi 810€ dhe totali në përqindje del 5.79%. Pse kjo përqindje e pakuptimtë? Te karburantet për vetura, në vitin 2024 te zyra e kryetarit janë 5000€ dhe në pyetjet që i kemi pasur më herët keni thënë që hyjnë edhe kategoritë tjera, jo veç zyra e kryetarit. Nëse ka mundësi që këtë raporte t'i dalloni, që mos ta vendosni komplet zyrën e kryetarit, por, t'i ndani në kategori që t'i dimë shpenzimet. Te kodi 14060, mirëmbajtje rutorore janë tri kode dhe janë shpenzuar 160.000€, për çfarë kontrata është fjala? I kemi dy kode të shërbimit e avokaturës dhe shërbimet e ndryshme intelektuale dhe këshilldhënëse. Te e avokaturës janë 30.000€, te këshilldhënëse 10.000€, nëse i ndërrohet vlera, a është më mirë që 30.000 t'i vendosni te këshilldhënëse dhe jo te dëmi të avokatura, ndoshta më shumë këshilla, më pak gabime. Komplet karburant janë shpenzuar 34.500€ brenda këtij gjashtëmujorshi, në kilometra nëse e shikojmë me një çmim mesatar 1.30€ i bie që janë bërë 520.000km, m'u duk si shumë! Nëse ka mundësi një sqarim. Pyetja e fundit, furnizimi me uniforma të drejtorisë e Inspeksionit është rreth 9360€ ka qenë kontrata. Sa ka staf? Sa ka kushtuar një uniformë?

**Burim Krasniqi:** Drejtor, te raporti financiar ka disa pozicione që ka rënie të të hyrave, ka trend negativ kur krahasohet me vitin paraprak. Te taksat komunale, te tatimi në pronë, a është rezultat i ligjit të ri për tatimin në prone, apo ku është rezultati i kësaj? Në seancën e kaluar e kam dhënë një sugjerim që duhet të rishikohen edhe një herë sipërfaqet e shtëpiave të banimit, sepse aty ka një dallim që është duke u shkaktuar kjo çështje. E dyta, te lejet e ndërtimit ka trend negativ, nuk është që ka reduktim të ndërtimit të objekteve, por lejet ndërtimore kanë të hyra më pak sesa vitin paraprak për periudhën e njëjtë kohore. Te shpenzimet: Në raportin financiar si obligime janë 16.156.000€, 14 milion prej investimeve kapitale, që i bie një pjesë e konsiderueshme të drejtorisë e Shërbimeve Publike. Drejtor, kjo drejtori në gjashtëmujorin e parë ka bërë pagesa vetëm 800.000€, jo më shumë. Nuk ka më shumë

punë të kryera se 800.000€, kur kemi parasysh që kemi obligime prej 2020, 2021, 2022, 2023, 2024 dhe realizimi është vetëm 800.000€. Në anën tjetër, janar-qershor kemi kontrata 1.691.000€, ndërsa obligime të vitit 2024 janë vetëm 750.000€. D.m.th, janë lënë obligimet e vitete paraprake dhe janë paguar rreth 900.000€ obligimet e vitit 2024. Nuk është ndjekur vazhdimësia e mbylljes së obligimeve. E fundit që më la përshtypje, komuna ka arritur të vie në 300.000€ punë të kryera (fatura), borxh financiar, jo obligim kontraktual dhe me përjashtim të mbi 200.000€ të obligimeve të vitit 2020, 2019 e tutje janë shlyer të gjitha. Nuk ka obligime të kontratave të mëhershme të nënshkruara, që besoj që duhet të ketë, sepse rruga Xërxë-Rahovec që nëse nuk jam gabim, kontrata është e lidhur para vitit 2020.

**Defrim Kafexhiu:** Te të hyrat vetanake, pothuajse është viti i dytë që Komuna e Rahovecit po e tejkalon planifikimin e të hyrave, a mund ta di pse? Cilat janë masat që i keni marrë në grumbullimin e të hyrave që ka tejkalim të parashikimeve? Një pyetje e kam te avokati i komunës, i cili për këtë gjashtëmujor i ka kushtuar 28.000€. Kryetari, në fillim kur kemi debatuar rreth kontratës që Komuna e Rahovecit e ka lidhur me avokatin, ka thënë që mund të variojë prej 1000 deri në 5000€. Dëshiroj ta dëgjoj një koment prej kryetarit për këtë çështje.

**Kryetari:** E di që drejtori i Financave është protagonist i pregatitjes së kujdesshme të raportit 6-mujor financiar dhe besoj që i ka të gjitha përgjigjet. Dua ta plotësoj pak Burimin, se edhe mua m'u duk interesant. Janë paguar obligimet financiare të vitit 2024 dhe ndoshta në vitet paraprake jo. Ne e kemi grantin e performancës dhe granti të obligon vetëm investim në projekte të reja, bile granti nga MAPL-ja sivjet duhet të shpenzohet, gjysma tjetër financohet nga Demos-i dhe ambasadat përkatëse. Rritja e të hyrave, te Defrimi. Po, është tejkalim i të hyrave. Në radhë të parë ka më shumë vetëdije dhe ndërgjegje ndaj obligimit të tatimit mbi pronë, gjithashtu ka një aksion më efektiv të drejtorisë së Financave. Madje, kërkesë nga auditori e kemi që duhet të regjistrojmë sa më shumë pronarë që kanë prona. Bëhet fjalë për një ndërmarrje më efektive të komunës, sepse regjistrohen edhe prona dhe ndërtime të reja nga eklipi i tatimit në pronë.

**Defrim Kafexhiu:** Te shpenzimet për informim, ishin 4400€, për çka shpenzohet këto mjete? Një kërkesë tjetër e kam, "shërbimet e ndryshme intelektuale dhe këshilldhënëse" 7100€ është shuma për këtë gjashtëmujor të vitit 2024. Besoj që për ta kursyer buxhetin e komunës për këtë gjashtëmujorin e dytë, mund ta thirrni ndonjë ekspert prej kuvendit për këshilldhënie.

**Kryetari:** Kuvendin e vlerësojmë, është institucion që dominon ekspertiza. I konsideroj shumë të rëndësishme këshillat e secilit këshilltar këtu. Konsulenca nuk është veç avokati, ka konsulencë për hartimin e projekteve - inxhinier, ekonomist.

**Afrim Limani:** Faleminderit për pyetjet, nëse eventualisht ndonjë nuk kam mundur ta regjistroj, e lëmë opsionin e komunikimit interaktiv. Te Leonardi: Te tabelat/shtyllat i bëjmë me formulë dhe në momentin që nuk ka të dhëna del ajo pjesë. Te certifikatat e lindjes, planifikimi i madh-realizimi i vogël. Sa i përket kësaj, janë të regjistruar në kodin e taksave, sepse ndonjëherë ndodh ndonjë gabim në sistem. Pyetja tjetër ishte se pse në zyrën e kryetarit ka kaq shumë shpenzime me vlerë 5000€: Në kuadër të zyrës së kryetarit veprojnë edhe disa sektorë, siç është zyra e prokurimit, e auditimit, ligjore, të informimit etj... Zyra e kryetarit e ka kodin e veçantë dhe në bazë të veturave që janë mund të dimë saktë në mënyrë analitike edhe pse asnjëherë nuk e kemi praktikuar këtë gjë. Mos të harrojmë që edhe çmimi në këtë vit është pak më ndryshe. Te përmbajtja rutinore, ne i kemi dy kontrata të mëdha që merren me pastrim të ambientit, me Ekoregjionin dhe Ekodrininë. Mirëmbajtja është për dy sezona, verore dhe dimërore. Shpenzimet e avokaturës u diskutuan. Raporti është i specifikuar detajisht prej 1 janarit deri më 30 qershor. Shërbimet këshilldhënëse: Kryesisht janë komitetet që i paguajmë, obligative dhe joobligative. Te uniformat, nuk janë vetëm të inpekcionit, por edhe të sektorit të tatimit, që gjithsej bashkë janë 17 punëtorë. Burimi tha për rënien e të hyrave të tatimit në pronë. Po, është e vertetë! Kjo rënie ka ndodhur sepse vitin e kaluar shpërndarja e faturave të tatimit në pronë ka ndodhur më vonë dhe qytetarët nuk kanë ngurrar që të paguajnë. Është fakt që te lejet ndërtimore nuk ka pasur kërkesa për leje nga qytetarët. Pyetja tjetër e Burimit ishte, pse kaq pak obligime financiare? Të them të drejtën kaq është, operatorët po e kryejnë punën dhe në aspektin ligjor e dorëzojnë faturën që ta kenë një garanci. Te Defrimi, pse po tejkalohen të hyrat vetanake: Ne e bëjmë një planifikim real, të cilin e dorëzojmë në departamentin e buxhetit dhe zakonisht ata e kanë zbritur atë që ne e kemi planifikuar. Realisht dy vitet e fundit, përveç realizimit, jemi duke e tejkaluar planin. Tejkalmi është shumë i mirë për ne, sepse ato para i dedikojmë në projekte të ndryshme.

## **11. Shqyrtimi i Informatës të Drejtorisë për Bujqësi, Pylltari dhe Zhvillim Rural;**

**Berat Duraku:** Faleminderit kryesues! I nderuar kryetar, nënkryetar, kolegë drejtorë, asambleistë. Para jush keni të gjitha aktivitetet dhe punët që janë kryer në Drejtorinë e Bujqësisë në periudhën gjashtëmujore. Këtë material e kemi ndarë në dy periudha, janar-shkurt-mars dhe prill-maj-qershor. Fillimi i vitit është karakterizuar me aplikimin e fermerëve për subvencionet e qumështit. Në këtë fazë kanë aplikuar 91 fermerë me gjithsej 1.7 milion litra dhe 522 krerë të viçave. Në këtë periudhë është hapur thirrja për aplikimin e fermerëve vreshtarë për luftimin e sëmundjes “Cikadia”. Kanë aplikuar fermerët, janë zgjedhur përfitësit dhe gjithashtu është bërë shpërndarja e preparateve për luftimin e sëmundjes “Cikadia”. Në periudhën e dytë e kemi hapur thirrjen për aplikim për pleh. Kanë aplikuar 1128 fermerë, prej tyre janë zgjedhur përfitësit. Në këtë proces akoma nuk ka filluar shpërndarja dhe shpresojmë që nga e hëna fillon, do ta bëjmë njoftimin. Në materialin e juaj janë disa të dhëna tabelare, kryesisht janë nga aplikacionet e fermerëve që kanë aplikuar në programin e pagesave direkte në kuadër të Ministrisë së Bujqësisë. Në këtë thirrje kanë aplikuar 3099, nëse e krahasojmë me vitin e kaluar, kemi 20 aplikues më pak. Vlen të theksohet që në këtë vit kemi rritje të sipërfaqes në perim-kulturë, ndërsa kemi lënie të grurit dhe të misrit. Gjithsej në skemën e granteve, projektet të cilat kanë kaluar janë 1.160.000€ dhe nëse kalon lista rezervë janë shtesë edhe 923.000€.

**Burim Krasniqi:** Drejtor, faleminderit për informatën. Te pjesa e drithërave ka rënie shumë. Te gruri 230 ha më pak, te mistri 67 ha më pak. E keni diskutuar me bujqit, pse po ndodh kjo? E dyta, këtë fenomen shqetësues e kemi të vreshtat, ka filluar të bie sipërfaqja me hardhi. Jemi të njohur si “Grapeland”, por nëse fillon të bie sipërfaqja me hardhi, fillon shqetësimi. Mendoj që ndoshta është mirë ta shohim edhe këtë arsyen pse po ndodh kjo. Pjesa e perimeve, lakra, speci, këto janë variabile dhe bujku e ndjek tregun. Më la përshtypje që the që plehu do të shpërndahet nga e hëna. Te drithërat, plehu më nuk përdoret, përveç mbjelljeve e reja të grurit. A është analizuar si të bëhet kjo punë? A do ta shpërndani plehun që të përdoret për vitin e ardhshëm? Kërkoj mirëkuptim që vitin tjetër me inpute të fillohet më herët, që kur të fillon pranvera e hershme, bujqit t’i kenë ato lehtësirat e veta. Berat, secili jemi marrë me bujqësi dhe e din që pranvera është periudha më e vështirë, nëse bujku ngarkohet me shpenzime. Një pyetje të fundit që ndërldhet me bujqësinë dhe me drejtorinë e Ekonomisë: Rreth depove grumbulluese që kanë filluar të bëhet te Bërnjaka, a janë afër të jepen? Besoj që qëllimi është lehtësi për bujkun, së paku në periudhat më të vështira kur është çmimi më i lirë, t’iu mundësoni që t’i ruajnë produktet, për të pritur në stabilitet të çmimit.

**Sejfullah Sejfullahu:** Faleminderit drejtor për informatën! U përmend lista rezervë, si janë gjasat të arrihet ajo listë dhe a kemi ndonjë shansë, që nëse më pyesin buqit ta di çka t’ju përgjigjem.

**Hasan Përboqi:** Drejtor, faleminderit për informatën! Në bazë të tabelarëve, shihet që është punuar në mënyrë të mirë dhe të detajuar. Dua të ndalem te kultura bujqësore e grurit dhe po e shoh që diferenca me vitin e kaluar është minus 223 ha. A keni ndonjë informatë apo statistikë se sa është rendimenti për hektar? Jemi duke e parë një fushatë të qeverisë dhe prej Ministrisë së Bujqësisë që është siguruar buka e motmotit, si qëndron komuna jonë me statistika? Nëse bazohet në atë fushatë, duhet të jetë më shumë!

**Berat Duraku:** Burim, gjatë pyetjes tani e the edhe përgjigjen, fermerët kryesisht punojnë në atë që e shohin lavërtinë. Duke u bazuar në çmimet e vitit të kaluar të perimeve, kanë qenë të mira dhe kanë përfituar, atëherë është rritur sipërfaqja në perime dhe në kulturë lavërtare ka rënë. Shqetësuese është kjo e rrushit, viti i kaluar ka qenë shumë i vështirë dhe pak vreshtarë kanë marrë “breqet” në kulturat vreshtare. Kryesisht ato sipërfaqe i kanë lënë të papunuara dhe nuk kanë aplikuar fare për subvencione. Te plehu e ke me të drejtë. Tani është koha kur fermerit nuk i nevojitet në këtë fazë, por ky është lloji i plehut përdoret për të gjitha stinët e vitit. Procedurat për shpërndarjen e plehut artificial i kemi filluar në tetor të vitit të kaluar. Procedurat e tenderit, prokurimit, është vonuar në OSHP mbi 5 muaj dhe kemi arritur këtu ku jemi. Sefa pyeti për listën rezervë. Nëse mund t’ia cilësojë një vendim të mirë këtij ministri aktual, Faton Peci, është vetëm një vendim që e ka marrë në viti 2022 për t’i kaluar të gjithë fermerët që kanë qenë në listën rezervë. Shpresojmë që ky veprim do të merret përsëri. Përndryshe, viti i katërt i Faton Pecit si ministër dhe është duke i zbatuar vetëm dy thirrje në skemën e granteve. Hasani e përmendi fushatën e atyre që po thonë e kemi “siguruar bukën”, ne nuk e kemi ndonjë menakizëm matës, por duke ku bazuar në të dhënat që i kemi, del që viti i kaluar me tani është pothuajse i barabartë. Këtë vit rendimenti është më i mirë, 4500-5500 është mesatarja për këtë vit, ndërsa



në vitin e kaluar ka qenë 3500-4300 dhe kur përpjesëtohet me atë që kanë rënë sipërfaqet këtë vit, i bie që është pothuajse njëjtë.

**Sejfullah Sejfullahu:** Me 3 dhe 4 gusht e kemi festën tonë, Agro-festën dhe mirë është që të vijmë të gjithë. E ruajta me qëllim këtë te drejtorja e Bujqësisë.

**Berat Duraku:** Po, ka filluar propovimi i festës së perim-kulturës në Krushë të Madhe. Do të mbahet më datë 3 dhe 4 gusht. Do të filloj në orën 4 pasdite deri të nesërmen në 4 pasdite. Nata e parë është kryesisht ajo me aktivitete muzikore, nata e dytë është e karakterit e aktiviteteve. Ju ftoj të gjithëve në Krushë të Madhe dhe pastaj të bëhemi gati për festën e vjeljes së rrushit me 6,7,8 shtator.

**Kryetari:** Në Krushë të Madhe me 3,4 gusht është "Agro-festa". Me 30 korrik është buxheti me pjesëmarrje në parteritet me kontratën sociale -USAID-in me moton "ec për qytetin" dhe kemi planifikuar t'i ndajmë 30.000€ për projektin fitues. Më 30 korrik në ora 16:30 jepen propozimet. Ju ftoj që të jeni prezentë në parkun e qytetit, ky program realizohet për herë të parë bëhet në Rahovec, është pilot-projekt. Vendosin qytetarët përmes votimit të drejtpërdrejt. Mund ta bëjmë një projekt, dy, pesë, por edhe shtatë. I mirëpresim qytetarët të jenë prezentë dhe aktivë. Te konsulenca për fitimin e granteve ka arritur deri në 6 milion € për grante, sepse konsulenca e din sakt se kush do ta fitojë projektin, e kush jo. Kjo është dobia e konsulencës. Sa që ndonjëherë Faton Peci po thotë që "a krejt buxheti duhet të shkojë në Rahovec a?" Megjithëse unë jam tepër i pakënaqur me disa politika të Ministrisë së Bujqësisë, sepse realisht vetëm 2 herë brenda 4 viteve është hapur thirrja për grante dhe në thirrjen e dytë ende nuk i kemi përfituesit për implementimin e granteve të fituara. Fatkeqësisht jemi 3099 fermerë aplikues dhe kjo është e vërteta.

**Defrim Kafexhiu:** E kam një kërkesë për kryetarin e komunës. Kërkoj prej teje kryetar, si i pari i komunës, t'i ftoni vreshtarët, besoj që jeni të informuar që janë dy shoqata të vreshtarëve. Komunikimin më të mirë me Ministrinë e Bujqësisë e ka shoqata e verëtarëve, për këtë po irritohen edhe vreshtarët. Ky irritim po del në opinion dhe po shfaqen probleme që janë të panevojshme. Kërkoj që të takohesh me vreshtarët, që fillimisht ata të jenë të koordinuar në kërkesat e tyre dhe të jenë njëzëri në kërkesat e bëra. Unë kam marrë pjesë në një takim që e ka pasur ministri me vreshtarët, kur ishte çështja e çmimit të subvencioneve për hektar. Ata janë totalisht të pakoordinuar në mes veti dhe kjo është duke ndikuar që ata të mostrajtohen mirë nga ministria e Bujqësisë. Te çështja e bashkëpunimit me USAID-in për këtë pilot-projekt, është njëra prej projekteve më kreative që e keni bërë deri tani si ekzekutiv, ju përgëzoj për këtë punë. Është një formë shumë atraktive e pjesëmarrjes së qytetarëve në vendim-marrjen e qeverisjes lokale.

## **12. Shqyrtimi i Informatës të Drejtorisë për Shëndetësi dhe Përkujdesje Sociale;**

**Saranda Sallteku:** Faleminderit kryesues! Përshëndetje për të gjithë! Sa i përket gjashtëmujorit të parë të Drejtorisë së Shëndetësisë, gjatë periudhës raportuese, janar-qershor ka zhvilluar aktivitetet e saja në të gjitha fushat e veprimtarisë, me qëllim të ngritjes së përgjithshme të cilësisë së shërbimeve dhe të jetës së qytetarëve në komunën tonë. Gjatë kësaj kohe është bërë shqyrtimi dhe janë bërë shumë përgjigje me kohë të kërkesave të qytetarëve për ndihma momentale financiare, prej të cilave 260 janë të miratuara. Ka vazhduar ofrimi i shërbimi mjekësor në dy ndërrime në dy QMF-të, në Krushë të Madhe dhe Ratkoc. Në Krushë të Madhe për momentin është duke u bërë renovimi dhe jemi bartur në Fortesë dhe punojmë deri në ora 21:00. Është duhe vazhduar shërbimi mjekësor i kujdesit shtëpiak, i cili trajton të moshuarit dhe ata me sëmundje të rënda që e kanë të vështirë mobilitetin te QKMF-ja apo QMF-ja. Në QKMF - në Rahovec funksionon aparati i mamografisë, i cili ndihmon për të diagnostifikuar më herët kancerin e gjirit. Janë kryer shumë vizita sistematike të nxënësve në shkollat e komunës sonë. Vazhdon furnizimi me barna esenciale nga buxheti i komunës, vazhdon renovimi i objektit të QMF-së dhe është bërë përrurimi i objektit të QMF-së në Ratkoc.

**Burim Krasniqi:** Drejtoreshë, faleminderit për informatën. Te informatat e shërbimeve sociale, i kemi disa shifra që ndonjëherë janë shqetësuese. Për gjashtëmujorin e parë janë 7 fëmijë të keqtrajtuar, 30 fëmijë me punë të rënda. 9 fëmijë me sjellje sociale dhe 15 fëmijë delikuentë. Besoj që kur të vjen raporti njëvjeçar mundësisht të ketë raport krahasues me vitin paraprak, që të mund të shohim nëse ka trend të rritjes apo të rënies. E dyta, ashensori në QKMF, a ka kontratë të mirëmbajtjes? Dje kam qenë me familjarë, nuk ka punuar dhe sot nuk punon gjithashtu. Analizat janë në kat të dytë, repartin e Gjinekologjisë e keni ende më lart dhe me një formë dje dhe sot nuk ofrohen shërbimet normale, për shkak të pamundësisë të qasemi aty. Kur pritet ashensori të kthehet në funksion? Shqetësimi i fundit:

Para disa dite u.d së drejtorit të QKMF-së në Rahovec, i ka ftuar 3 mjekë dhe iu ka kërkuar dorëheqjen e tyre, me arsyetimin që nuk kanë marrë pjesë në diskutim për buxhetin kur ka qenë kryetari i komunës. Kur është kërkuar arsyeja e dorëheqjes, është thënë që është kërkesë e drejtoreshës së Shëndetësisë, sepse nuk keni marrë pjesë në debat publik me kryetarin e komunës dhe jeni të papërgjegjshëm. Nuk dua të besoj që qëndron kështu, kërkoj një sqarim nga ana juaj, se si mundet një drejtor të bëjë presion në këtë mënyrë te stafi shëndetësor. A qëndroni prapa kësaj dhe ju lutem shkoni në QKMF dhe bisedoni, si dhe mendoj që është e udhës të sqaroheni, sepse është e papranueshme joetike dhe e dëmshme për shoqërinë tonë.

**Defrim Kafexhiu:** Kisha pasë qejf ta dëgjoj si informatë prej drejtoreshës së Shëndetësisë, llogaridhënia e drejtorit të QKMF-së kundrejt drejtorisë së Shëndetësisë. Kemi dëgjuar edhe prej infermierëve dhe prej personave që punojnë në QKMF, që selektimi i njerëzve për ndërrimin e orareve, po bëhet për çështje inati të drejtorit. A jeni të njoftuar për këtë çështje dhe a është marrë ndonjë masë disiplinore ndaj tij? Një pyetje politike e kam, e keni pritë si Alencë në Rahovec që drejtori i QKMF-së ta përfundojë specializimin, që është kusht t'i nënshtrohet konkursit për drejtor të QKMF-së. Tani përveç qytetarëve, ju ka zhgënjyer edhe juve, nuk ka arritur të specializojë. A do ta pritni deri në aplikimin e radhës për specializim, apo do ta vazhdoni me ndonjë figurë tjetër që po ashtu kemi informata që mund të ndodh?

**Vlora Vuçiterna:** Një pyetje të shkurtë në lidhje me barna, a keni kontratë me furnitorin, sa është vlera dhe kush është furnitori? A është pikë farmaceutike apo ndonjë barnatore?

**Saranda Sallteku:** Faleminderit! Burim, sa i përket liftit, e kemi lajmëruar kompaninë dhe besoj që sot gjatë ditës do të rregullohet. Për ata 3 mjekë që the, nuk është e vertetë dhe nuk jam e informuar.

**Burim Krasniqi:** Drejtoreshë, unë të njoh moti, jo sot dhe nuk kam dashur të besoj që kjo është prej teje, por drejtori aktual i QKMF-së i ka thënë 3 mjekëve që duhet të japim dorëheqje, sepse nuk kanë qenë në dëgjimin buxhetor të kryetarit me stafin mjekësor.

**Saranda Sallteku:** Vlorë, sa i përket barnave esenciale, kemi kontratë dhe është deri në tetor të këtij viti. Vlera është 65.000€ dhe janë ndarë në një lot, me reagenca dhe me material shpenzues. Për furnitor nuk e di. Sa i përket pyetjes politike të Defrimit, unë jam me të gjithë, sepse ndryshe nuk do i merrja 700 vota.

**Kryetari:** Drejtoresha e Drejtorisë për Përkujdesje sociale përfaqëson, mbron, justifikon dhe realizon politikat komunale për shëndetësi dhe përkujdesje sociale. Ne i vlerësojmë shumë mjekët dhe personalin shëndetësor në QKMF, për përgjegjësitë dhe punën e tyre. Ne përfaqësojmë politikën e avancimit në karrierë të profesionistëve shëndetësorë. Në politikën tonë ka ardhur një moment dhe kam kërkuar nga drejtoresha që megjithatë duhet të ndodh një ndryshim cilësor në pikëpamje të vendimmarrjes brenda institucionit. Nuk mund të jetë koordinator për performancë në të gjitha shërbimet mjekësore vetëm një njeri dhe atë 20 vjet. Nuk është çështja e pjesëmarrjes në debat publik, çështja është më e thellë, sepse është një praktik joobligative ligjore që unë i bëj takimet periodite me punëtorët shëndetësorë, që realisht bëhet fjalë për planifikimin e hershëm buxhetor. Kur unë shkoj aty, shefi i sektorit flet ndryshe, puntori i atij sektori flet ndryshe. Është një komunikim jo të mjaftueshëm edhe brenda sektorëve dhe ne kemi thënë që le ta bëjmë ndryshim që duke mos iu ndërruar statusin, le të ndërrohen disa dhe le të vijnë të tjerë, por jo specifikisht kush e tek. Ky është mesazh, a do të ndodh apo jo, ne nuk mund ta bëjmë vet, sepse ata e kanë statutin e QKMF-së. U.d të drejtorit të QKMF-së është brenda këtij mesazhi dhe duke qenë një mjek i ri dhe mund t'ju them që më mirë punët shkojnë në QKMF sot, se sa kur ka qenë drejtor me kompetenca të plota një personalitet i çmuar i shkencës mjekësore, z. Korenica. Pra, jemi duke luftuar që në QKMF, ta reflektojmë trendin e ecjes përpara. Respekt të plotë kanë të gjithë aty. Prishje të ashensorit mund të ketë dhe ka, ne kemi kontratë për servisim dhe duhet të rregullohet. Më pëlqejnë këto reagime se njëkohësisht i bëjnë më të përgjegjshëm ata që janë aty. Një gjë mund t'ju them që QKMF në Rahovec, ka kapacitete më shumë se sa që ka pasur, është shumë fleksibile në kryerjen e shërbimeve, ka zhvillime të reja, ka barna esenciale dhe gjithashtu edhe komuna ka impakt të madh aty. Kur kam ardhur unë në 2018, aty nuk kanë folur mjekët në mesveti për arsye qesharake. Tani ka një menaxhim dhe një gjendje të përmirësuar. Pritja dhe mos-hapja e konkursit nuk ka të bëjë vetëm me një emër, ne nuk e dijmë kur hapet dhe unë nuk e di a e ka dhënë testin a po jo, sepse nuk merrem me atë punë hiç. Sytë janë për të parë dhe vërehet që brenda QKMF-së ka lidhshmëri më të mirë dhe vazhdimisht punojmë

për shërbime të reja dhe aftësim profesional. Jemi duke e mbajtur situatën mirë me ushtrues detyre edhe pse e ka afatin edhe 3-4 muaj dhe më shumë nuk ka të drejtë, mund ta bësh një ushtrues detyre tjetër, po jo të njëjtin.

**Burim Krasniqi:** Je pak kundërthënës në fjalim! The që nuk është mirë, ka nevojë për ndërrim dhe the që, ka zhvillim, ka rritje, ka suksese, ka rezultate. A ka rezultate dhe që e kanë bërë punën mirë, apo nuk ka rezultate, e kanë bërë punën keq. E dyta, me aq sa kam informacion, personat përgjegjës kanë “aktemërim” nuk kanë kontratë. Aktemërimi garanton punë të përhershme, deri në pensionim. Nëse nuk ka qenë në rregullt, është dashur që deputetët e të gjitha partive të votojnë ligje për t’i bërë me mandat, sepse janë pozicione të ndishme dhe ka nevojë për freskim. E fundit, mendoj që në krejt botën, eksperiencia e zhvillon njeriun. Pozitat menaxheriale nuk janë punë praktike, janë pozicione që kërkojnë njerëz me eksperiencë. Nëse mendojmë t’i heqim njerëzit me eksperiencë, për t’i vendosur njerëzit e rinj për t’u mësuar ngadalë, është gabim. Në qoftëse kanë aktemërim, t’i hiqni është joligjore. Nëse themi që ka zhvillim në të gjitha aspektet në QKMF dhe në shërbimin primar shëndetësor, të themi na duhet ndërrimi, përsëri është gabim.

**Kryetari:** Në jetën time personale dhe aktualisht me përgjegjësi direkte publike, zakonisht nuk jam kontradiktor, as kundërthënës, bile antagonizmat i luftoj gjithë kohën. Padyshim që ka zhvillime cilësore të dukshme në krejt ecurinë e zhvillimeve në QKMF- në Rahovec dhe në të gjithë rrjetin e AMF-ve dhe QMF-ve. Ka zgjatje të shërbimeve shëndetësore, personale në rritje, pajisje të reja shëndetësore dhe më shumë shërbime shëndetësore dhe e gjithë kjo nuk mund të konsiderohet ndryshe përveç se sukses. Ndërrimi nuk ka lidhje me persona të përveçëm, por duhet të reflektojmë, por duhet të reflektojmë me një ndryshim edhe me kapacitetet vendimmarrëse të QKMF-së. Unë jam treguar i matur, sepse kam përvojë, e kam prituri deri sa ka dalur në pension doktorin e nderuar, z Korenica. Ai ka qenë drejtor me kompetenca të plota, por nuk e ka dëgjuar askush në kuptimin e menaxhimit, sepse të gjithë të tjerët përreth e kanë konsideruar veten më të zotë në kuptimin e menaxhimit. Për tetë vite me mua, asnjëherë nuk e kam prekur asnjë shef të sektorit. E ka parë nevojën e një ndryshimi, pa patur nevojë t’ia mohojmë eksperiencat, sepse ne po flasim vetëm për menaxhim. Në qoftëse kanë “aktemërim” dhe nuk e lejon ligji, “therrën në këmbë të shëndosh, askush nuk e fut”. Ne e bëjmë një hap me marrëveshje, sepse ka prej atyre që janë lodhur. Për atë përgjegjësi menaxheriale që e kanë, ata nuk paguhën më shumë, por, vetëm si specialistë. Është i nevojshëm ky ndryshim, sepse është e pamjaftueshme ajo që ndodh në disa sektorë të QKMF-së.

**Sejfullah Sejfullahu:** Po flas, po “inshallah” nuk kthehet kryetari për përgjigje, sepse i bën gjatë. Realisht nuk është fusha ime e mjekësisë, por puna e liftit, mendoj që operatori në fillim duhet ta vendos një lift më të mirë. Në 2004 më ka ndodhur në spital të Prishtinës, është prishur lifti duhet e mbajtur “xhenazen” te poshtë, veç shpirti im i din ato përjetime. E dyta, a është rritur numri i lindjeve në QKMF dhe sa është dallimi me atë se kur kanë qenë subvencionet më të vogla dhe e treta, the për riorganizim të brendshëm, me aq sa jam i informuar, një gjë e tillë është e ndaluar prej gjykatës së apelit dhe jam kureshtar ta di nëse ka diçka të tillë.

**Saranda Sallteku:** Gjatë vitit të kaluar kanë qenë 23 lindje gjithë vitin, tani deri dje janë 18. Sa i përket riorganizimit, bashkë me këshillin drejtues, orarin e punës e bën drejtori i QKMF-së me kryeinfermierin.

### **13. Shqyrtimi i Raportit të Drejtorisë për Arsimit rreth përfundimit të vitit mësimor 2023/2024;**

**Nënkryetari:** I nderuar kryesues, kryetar, të nderuar kuvendarë, drejtorë. Në mungesë të drejtorit, po e prezantoj shkurtimisht raportin e Drejtorisë Komunale të Arsimit për vitin shkollor 2023-2024. Raporti është i ndarë në 4 periudha. Shtator – nëntor janë të paraqitura të gjitha punën që kanë përfunduar. Riparimet në shkolla, ekonomizimi, garat e diturisë, olimpiada e matematikës dhe fizikës, pajisjet me mjete konkretizimi dhe pajisjet laboratorike që janë vendosur nëpër shkolla, dezinfektimi, dezinfektimi dhe deratizimi i objekteve shkollore, vizitat sistematike etj... Raporti ka edhe fotografi dhe nëse eventualisht ka ndonjë pyetje, ato që i dimë do të përgjigjemi, për të tjerat, e presim drejtorin.

**Leonard Morina:** Në informatën e DKA-së, të paraqitura më shumë ka investime kapitale, sesa ka të bëjë me mësimdhënien, mësimnxënien, mungesat e nxënësve, trajnimin e mësimdhënësve. Mendoj që investime duhet të jenë poshtë informatës. Në 17 pikat e para përmenden investimet kapitale. Te kjo informatë më ra në sy dhe nuk më pëlqej, klasën e 9-të e kanë përfunduar 547 nxënës. Në vitin e parë që janë regjistruar i kemi 280 në klasë të 10. Afër 50% e nxënësve nuk ndalen në shkollat e Komunës së Rahovecit. Cilat janë arsyeja? Për mendimin tim, janë dy arsye: Njëra mund të jetë për shkak të mungesës së drejtimeve që ata i kërkojnë, ose mund të jetë ky imazh i keq që është krijuar

për shkollat e mesme në Komunën e Rahovecit, gjë që nuk e besoj që është, por qytetet tjera dijnë të punojnë më mirë ndoshta me propagandë. Te pjesa e dytë, kërkoj prej drejtorisë së Arsimit dhe prej kryetarit të komunës të rregullohet imazhi i shkollave të mesme, sepse në qoftëse 50% të nxënësve nuk e dëshirojnë regjistrimin në këto shkolla të mesme, është problematike për të ardhmen. Besoj që të gjithë duhet të angazhohemi që kjo pasqyrë të ndryshohet.

**Kryetari:** Leonard, i përmende dy faktorë që ndikojnë: I pari, që njerëzit mund të kenë nevojë për drejtimet që mungojnë në shkollat tona të mesme. Drejtimet e reja dhe të nevojshme i jep Ministria e Arsimit, kuptohet me lobime në bazë të orientimit të nxënësve në karrierë. I dyti, përzgjedhja e kolegjeve private, për mua është shqetësues që këtë që janë a po arrijnë të marrin mjaftueshëm atë që duhet. Shkollat e mesme te ne në Kosovë janë qëllim i madh dhe njëkohësisht sfidë e madhe. Jemi të kënaqur me programet që i ka aplikuar komuna, qoftë me efikasitet, qoftë me investimet tjera dhe gjendja fizike e objekteve është 100% më mirë. Besoj që për të gjitha paqartësitë tjera, Avniu kur të vjen ju përgjigjet.

**Nënkryetari:** Besoj që infrastruktura në shkolla kurrë nuk ka qenë më e mirë dhe më moderne. Te mësimnxënie dhe mësimdhënia i takon më shumë atyre, sepse ata marrin secili nga një pagë dhe secili e ka pranuar ta nënshkruajë kontratën për atë punë, njëjtë siç e bëjmë ne këtu. Arsimitarët, mësuesit dhe profesorët janë të obliguar t'i edukojnë nxënësit. Përndryshe, pajtohem me ty që në këtë raport të Drejtorisë së Arsimit, t'i kemi edhe mungesat e nxënësve dhe arsimtarëve në secilën shkollë. Nëse i dënojmë nxënësit për mungesa, duhet ta bëjmë të njëjtë gjë edhe me arsimtarët dhe mendoj që çdo shkollë duhet ta aplikojë këtë sistem të punës.

#### **14. Shqyrtimi i Informatës mbi realizimin e Planit të Punës së Zyrës së Prokurimit, janar-qershor 2024;**

**Kryetari:** Shefi i Prokurimit gjithashtu ka gazmend familjar në familje. E mora përsipër ta lexoj raportin e zyrës. Ai e ka bërë një raport të shkurtër për këtë gjashtëmuor, thotë se janë 43 aktivitete të prokurimit, 31 kontrata të nënshkruara të të gjitha llojeve të prokurimit me vlerë 1.373.4693.68€. Tri aktivitete të prokurimit janë në OSHP, nga 2 prej këtyre ekspertit i OSHP-së i ka dhënë të drejtë autoritetit kontraktues. Personeli i zyrës së prokurimit ka proceduar 588 urdhër-blerje. Një procedurë është jashtë planit të prokurimit, sepse e kemi një memorandum mirëkuptimi me një nga ministritë e linjës. Deri më tani për këtë gjashtëmuor plani i prokurimit është 82% dhe mund të themi që komuna jonë është më e mira në nivel Kosove, sa i përket realizimit të veprimeve të planifikuara të prokurimit.

**Leonard Morina:** Meqenëse edhe në seancën e mëhershme ka munguar zyrtari i prokurimit. Vlera e parashikuar e kontratës ka qenë po e zëmë 100.000€ dhe kur ka ardhur puna për nënshkrim ka qenë çmimi i njëjtë. Në disa parashikimi që na ke thënë, ke thënë që ne mund t'i parashikojmë 20.000€, por, operatori mund të vie me 15.000 ta merr kontratën. A ka konkurrencë aty dhe nëse ska pasur, pse bash kështu sakt të gjitha kontratat, a janë të negociuar apo çka është puna?

**Kryetari:** Kontratat njëburimore janë krejt ndryshe. Në qoftëse një njoftim rrin 25 ose 30 ditë si njoftim zyrtar, atëherë është e hapur dhe u jepet e drejta të aplikojnë të gjithë ata që janë të interesuar. Mund të aplikojë një operator, dy, dhjetë apo më shumë. Kemi raste kur ka aplikuar veç një operator. Pse ka aplikuar veç një operator? Unë e di dhe nuk mund ta di, sepse nuk është punë e imja, por aplikimi është i hapur për të gjithë, konkurrenca gjithashtu.

#### **15. Shqyrtimi i Informatës mbi parcelat publike të dhëna në shfrytëzim nga Kuvendi Komunal;**

**Kryetari:** Ka qenë një kërkesë nga seanca e kaluar, që duhet t'i paraqesim se cilat janë atë prona që i japim në shfrytëzim me vendim të kuvendit dhe pastaj në ankand. E keni një listë të pronave dhe pronarëve dhe ju lutem që ta mbani pak diskrete, sepse është vetëm për kuvend. Ka të dhëna se sa metra katror janë dhënë, sa është qeraja dhe cilët janë shfrytëzuesit. Kjo informatë është e dobishme edhe për transparencë.

**Leonard Morina:** Meqenëse kryetari tha t'i ruajmë këto të dhëna, nuk po flasim me emra. Por, nëse dikush e ka marrë në shfrytëzim për 10 vite, afati i ka përfunduar në vitin 2020, kur i është vazhduar kontrata, a ka qenë në ankand? Apo automatikisht pronari ka pasur të drejtë për vazhdim dhe a rinegocohet çmimi për vazhdim?

**Kryetari:** Zakonisht Agjencioni i Pyjeve e ka programin 5 +, nëse e ka pasur për pesë vjet, pesë të tjera i vazhdohet me automatizëm. Komuna i ka 2-3 qëllime që i vendosë përmes komisionit. Një nga kriteret është të rritet vlera e pronës. Në këtë rast kur t'i përfundon kontrata, duhet ta vendosim propozimin në kuvend, merret vendimi dhe shpallet ankandi. Kontrata nuk ka shansë t'i vazhdohet a priori askujt, përndryshe është ilegale.


**15. Shqyrtimi i Informatës mbi realizimin e planit për mirëmbajtjen e hapësirave të hapura publike në Komunën e Rahovecit;**

**Përparim Krasniqi:** Faleminderit kryesues! Ne edhe në seancën e fundit e kemi pasur, por në bazë të planit të punës së kuvendit, ka qenë një informatë për implementimin e planit për investime në hapësira publike. Në bazë të planit i kemi dy kontrata që operojnë në komunën e Rahovecit, me vlerë totale 222.000 dhe me afat dy vjet. Operojmë me 162 pozicione, që përfshihen në varreza, lapidare, hapësira të lira publike, ujitja e drunjve dekorativë etj... Nëse keni ndonjë kërkesë shtesë për pastrim në vendbanimet ku jeni, ju lutem drejtoheni në Drejtorinë e Shërbimeve Publike.

**Sejfullah Sejfullahu:** Te kanalizimi që është duke u bllokuar, të intensifikohen më shumë punët rreth kësaj.

**Kryesesi:** Të nderuar anëtarë të kuvendit, nëse nuk keni pyetje tjera, ju falënderoj për vëmendjen tuaj dhe shihemi në mbledhjet tjera.

**Procesmbajtësi:**

  
Albion Krasniqi

